

OUON-AW-OK KE MA MESAIR HRAHRA HA OK

Ouon-aw ok, Jon se ma mesair kow hrahra ha hok non

Meyamey uwr hokwe: Aposel Jon.

Yier hiy ma lwayr meyamey hokwe: Hiykwe oionwaw Patmos mon lwak non meyamey.

Enekwei hiy ma meyamey hokwe: Hiykwe enekwei Yia 90-96 so ompok sok meyamey, Jisas hiy ma lokrue so meyki.

Ok mamey mon ma lwak mokwe senkin: Mamey honon-honon erey mon kokwe, ok ipey-ar kokwe houkrueys non. Houkmon peyr ko kokwe sios Esia ko me meyamey kow (Sapta 1-3), houkmon meyki ko kokwe, now hyo-sikowp hyo-sikowp, hiy ma liawon ira o, mon-piap-ma-piap weynpaweyn, omok uwrso mo owh mon lousne sa-ousne ey o, seme meyamey (Sapta 4-22).

Mamey okukwe weynpaweyn enekwei pariawey sok lousne ey me lohruw-a. Mamey okukwe hreme senkin mesair kow, God so Sipsip-ney Jisas so krai hokwe, Satan o, hyo poup lowpwarowp o, hmo eir mon lwak. Now non kokwe Jon hiykwe senkin lira, Satan se kokwe enekwei pariawey sok nuw-mon piapay lowpway ey. Peyr enekwei sohiy lousne lopa non kokwe, weynpaweyn piap-araw senkin senkin, hom lousne sa-ousne pie ey. Sawk hromo kristen hromkwe nonkway, Jisas aw lono akre-akre Uwr hiykwe ya ma-le a.

Mamey ohok ko uron ipey-ar hokwe senkin: Mamey panpaniowni non okukwe senkin mesair kow, Jisas, God so Sipsip-ney ihey-ar hiykwe weynpaweyn piap-araw mokwe ya mon piapay a, weynpaweyn yaprue homkwaw lwak peyow peyow ey mokwe. Enekwei sohiy non kokwe ehey-hu mokwe ya mon ahahay kow a, seyr aw ma-nak-ok lopa, seyr ma-lokrue lopa.

Jisas Krai sios iha sirom mu-nareysyar me ma mey kow hiy non

1 ¹ Mamey okukwe God so ouon-aw-ok Jisas Krai hiy ma mesair kow hrahra hok non. Hiykwe hyo mey-uwr me mesair hrahra kow e,

weynpaweyn omok lousne ey me. Ok somokwe, Jisas Krai hiykwe senkin mesair hrahra kow, hiykwe ensel prueyn se me-ha, hyo mey-uwr Jon so owh mon ley e.^a ²Jon hiykwe God so ok o, ok-ar-ok, Jisas Krai hiy ma mesair hrahra sohom o, seyr omeme lowpwarowp hiy ma lira sohom o, seme ma-sahre mesor kumay. ³Profet-ok, mamey erey ma lwak okukwe, posokwaw lira mesor e, hiykwe God so uron ihey-ar so ouon mon lwak. Seyr ok sokukwe posokwaw lonuayk e, seyr posokwaw nakruok kraiy e, homkwe God so uron ihey-ar so ouon mon lwak. Payhokuaw, enekwei hokwe pau ohriar.^b

**Jon so me-ihey-ok, sios iha sirom mu
nareysyar me ma mey kow hok non**

⁴Hakwe Jon, hakwe mamey okukwe uwrso sios iha sirom mu nareysyar non kipay Esia mon ma lwak me mey kow. Maym-kow-yor o, liwak-marowhway-yor o, hmo mon ka lwak. Yor somokwe, hromo God pokon ko o, paraw ko o, omok ma ma-le ey o, seyr Niohney iha sirom mu nareysyar non God so sia-king so inour mon ma lwak, hmo mon le.^c

⁵Jisas Krai hiy seyn, hme liy-liy-aw kow. Hiykwe God so ok me nan kiykiy-ay kraiy mesor kumay kow-uwr. Hiykwe ki-eyh ko se ma loksian mo peymawk-uwr. Hiykwe king lowpwarowp ki ko mo Hakamay, seyr hreme uron-pi ko-ar nuw-wak. Seyr hreme papo hrer-say kow, hromo yor piap-araw mo ouon ko mokwe, hyo nioh arian non.^d ⁶Seyr hiykwe hreme kokwe king orhey non o, pris orhey non o, po mon wak, hrom hyo Aio, God so mey ke meio kow e. Panpaniowni o, krai ipey-ar o, Jisas so mon-aw ka nuw-wak peyow peyow. Okar.^e

⁷Seyn lira, hiykwe waw non laynak-aye. Uwrso lowpwarowp homkwe hye lira ey, hmo nene arian non. Mo, uwr hye yeik non ma swapru-kawk sohom seyn, hye lira ey. Seyr uwrso ki ko lowpwarowp hom seyn, hye hokuaw kokwe ehey-yowp lyuk oun ey.

Ok-arar, yor somokwe ya lousne a.^f

⁸God Hakamay hiykwe senkin me, “Hakwaw-aw, hakwe Peyr-ar ko, seyr hakwe Meyki-ar ko. Hakwe God, pokon ko, paraw ko, seyr omok ma ma-le ey sohiy non. Hakwe God Krai Lowpwarowp non.”

**Jon hiy Krai se ma lira hiy non
(MHO 21:6; 22:13)**

⁹Hakwe Jon, hmo wayh, seyr Jisas so meyki ma ley so hokuaw hokwe, hakwe hme nion low non-way kraiy-uwr. Hromkwe low hromo mon ma

^a 1:1 MHO 22:6 ^b 1:3 MHO 22:7,10 ^c 1:4 Kis 3:14-15; MHO 4:5 ^d 1:5 Sng 89:27; Ais 55:4 ^e 1:6 1 Pi 2:9; MHO 5:10; 20:6 ^f 1:7 Dan 7:13; Sek 12:10; 1 Te 4:17

lousne omokwe, hromkwe meinkiw-p-ney-aw seme linon kraiyay, payhokuaw, hromkwe God so Wayr-hre-yier ko. Hanekwe Patmos oion-waw mon sehe lway swakeyn kow, ha God so ok ke ma mesor kumay o, seyr Jisas so mey me ma mesor hrsaysy sohom o, seme hokuaw. ¹⁰Hakamay so enekwei-ar lwak menkin, hanekwe sawk God so Niohney hiy nuw-wanohyay prusow. Hano meyki mon kokwe hakwe sawk uwr prueyn so wouk-ok ke lonuayk. Hiykwe aiopey hay nuw-iwower me, seik-saw-hu aiopey hay se hieyn. ¹¹Uwr sohokwe senkin me, “Hunkwe pay me lira e, mamey non mey nok, sios iha sirom mu-nareysyar seme kwa mey kow ha, om Efesus ko o, Smerna ko o, Pergamum ko o, Taiataira ko o, Sardis ko o, Filadelfia ko o, seyr Laodisia ko o.”

¹²Hakwe sa sehe kiy-swahre, wouk-ok hane ma ar-me sehe lira e. Ha ma swahre ira hokwe, sawk hakwe lam-sey iha sirom mu-nareysyar gol non ma meio hom nakrok me lira. ¹³Lam-sey sohom mo ompok mon kokwe, hakwe seyr uwr se lira. Uwr sohokwe Uwrsa mo Ney se hieyn. Hiykwe klos meimey ke nuw-ie swawar-sow ha. Klos sokukwe hyo sune kreysyar ke nuwnak-swakuwmay ha. Seyr hiykwe sumow-mays gol non ma meio kokwe mu-mawk mon nak-oxsa-peykyay. *Dan 7:13; 10:5*

¹⁴Hyo makwey o, hyo makwey-ohne o, sipsip mo owh-ohne me hieyn, weyspey-ar nuw-wak, seyr waw-weys ke hieyn nuw-ira. Seyr hyo nene hokwe ya ma krikri ke hieyn nuw-krikri yar.^g ¹⁵Seyr hyo sune mokwe bras, ya aiopey hay hok ma loum wosayk wosayk mnow-mnow me hieyn lira. Seyr hyo wouk-ok kokwe yawp huhu-oxsa aiopey hay se hieyn lwoun. ¹⁶Hyo iha sayar kokwe napuar iha sirom mu nareysyar me nakruok. Seyr hyo woki kokwe aw-seik hok lousne. Aw-seik sohok ko por kreysyar kokwe arupey-araw. Hyo ine-maku hokwe ey aiopey hay mawkueir sok ma lo se hieyn-aw lyar nekie nekie.^h

¹⁷Ha hye lira menkin, hakwe sawk hyo sune ohriar mon lokrue se hieyn makuayk hawon. Sawk hiykiaw hyo iha sayar non hane nekie nok, senkin kiy-me, “Peie hok o. Hakwe Peyr-ar ko, seyr hakwe Meyki-ar ko.ⁱ

¹⁸Seyr hakwe Uwr, su ma lwayr peyow peyow hiy non. Hakwe papo lokrue, sawk seyn lira, hakwe su lwayr peyow peyow. Seyr hakwe krai lokrue ko o, uwrsa ma lokrue mo yier ko o, hoho eir mon lwak. Seyr ki, hehe kampi kow ey hokwe hano iha mon lwak.

¹⁹Ompay ompay pokon ko o, omok ma lousne ey sohom o, hwon ma lira somokwe, kwa mey prosue. ²⁰Napuar iha sirom mu nareysyar, hwon hano iha sayar mon ma lwak me ma lira sohom o, seyr lam-sey iha sirom mu nareysyar gol non ma meio sohom o, hmo ouon-aw-ok ko meyk-ar mokwe senkin: Napuar iha sirom mu nareysyar non somokwe sios iha sirom mu nareysyar mo ensel. Seyr lam-sey iha sirom mu nareysyar non somokwe sios iha sirom mu nareysyar non hom non.”

^g 1:14 Ese 43:2; Dan 7:9; 10:6 ^h 1:16 Hi 4:12; MHO 2:12; 19:15 ⁱ 1:17 Ais 44:6; 48:12

Mamey sios Efesus ko me ma mey kow hok non

2 ¹“Hunkwe kwa mey kow ha, ensel sios Efesus ko se.
Ok omokwe uwr, napuar iha sirom mu nareysyar hyo iha sayar mon ma nakruok o, lam-sey iha sirom mu nareysyar mo ompok mon ma lanio o, hyo ok.^j ²Hakwe hno yor o, mey, hwon ma meio sese yay o, seyr hno lorok kraiy wayr yor o, somokwe papo nonkway. Seyr hakwe papo nonkway, hunkwe uwr, yor piap-araw me ma mon me lira muar. Seyr hunkwe uwr homkiaw-ayay aposel-ok ma me, seme papo leykawn ir, sawk hunkwe senkin lira nonkway, homkwe aposel korey. Homkwe okrei-uwr.^k ³Seyr hano uru se hokuaw kokwe low senkin senkin hno owh mon ma le mokwe, hunkwe nompou lwak pa, hunkwe meinkiowp-aw nuw-wak kraiy.

⁴Sawk hakwe hne ok kamon senkin kiy-me ley, hakwe kar ley pey, payhokuaw, hno yor, paraw hwon hane uron-pi ko-ar ma nuw-wak pie hokwe, enkin kokwe liy-liy-aw ma-lwak pey. Hunkwe po lokriy ha.
⁵Hunkwe kwa ma-nanpanan, hwon ma makuayk meime se. Hunkwe hno yor piap ko me kankoum sow ne nok, yor yaprue me ma-mon nakyas, paraw hwon ma mon nakyas pie seme. Hunkwe senkin lon lopa lwak ankin, hakwe le nok, lam-sey hno owh mon ma lwak sehe nakway ok.^l
⁶Sawk yor yaprue ihey, hno mon ma lwak kokwe senkin, hunkwe yor Nikolas so uwr-ku hom ma nakyas mokwe awnie awnie-aw lira. Ha seyn, hmo yor somokwe awnie awnie-aw lira.

⁷Uwr nweyk non hiykwe, ok, Niohney hiy sios me ma mekow seme kwa lonuayk. Uwr, aw-owk yaprue lowk ankin, hakwe now-i, now su lwayr peyow ey ko hokwe, hye mekow kanowr-a ey. Now sohokwe God so Wueir ihey-ar mon lwak.”^m

Mamey sios Smerna ko me ma mey kow hok non

⁸“Kwa mey kow ha, ensel Smerna ko se.

Ok omokwe Uwr Peyr-ar ko, seyr Meyki-ar ko, seyr ma lokrue, sawk su ma ma-loksian lwayr so. ⁹Hakwe hno low o, seyr hwon omeme ohna ma lwak sohiy o, somokwe hakwe papo nonkway. Sawk hunkwe omeme lopa-ar korey, hunkwe omeme ompuay ompuay non. Hakwe seyr papo nonkway, uwr har, hne ma me-piapmapiap homkwe homkiaw-ayay Juda-uwr ok me. Sawk uwr somokwe Juda-uwr korey, sawk Satan so uwr-ku orhey non.”

¹⁰Hunkwe peie hok o, low aw non nak-ok ey hno owh mon ma kiy-ousne ey somokwe. Satan hiykwe hmo uwr har mokwe kalabus-a mon

^j 2:1 MHO 1:16 ^k 2:2 1 Jn 4:1 ^l 2:5 MHO 3:3 ^m 2:7 Stt 2:9; MHO 22:2 ⁿ 2:9 2 Ko 11:14-15; MHO 3:9

nekie ok-swakreik ey, hme leykawn ey hokwe. Weyn, hme mon yorpayor ey mokwe, eypok iha seys non mon ey. Mo hme lokin kwor okrue e mon e hi, senkinaw kwa lorok kraiy. Sawk hakwe, hwon aw-owk yaprue ma lowk so hokuaw hokwe, makwey-kokway su lwayr peyow peyow ey ke lyay kow ey.^o

¹¹Uwr nweyk non hiykwe ok, Niohney hiy sios me ma mekow seme kwa lonuayk. Uwr, aw-owk yaprue lowk ankin, lokrue meyki ko hokwe hye liy ma-mon okrue ley.”^p

Mamey sios Pergamum ko me ma mey kow hok non

¹²“Kwa mey kow ha, ensel Pergamum ko se.

Ok omokwe uwr, aw-seik por kreysyar arupey-ar non so ok. ¹³Hakwe nonkway, yier hwon ma lwayr sohokwe, Satan so sia-king kokwe serey lwak. Hunkwe hano uru se-aw po nan kiykiy-ay orok kraiy. Seyr hno nan kiykiy-ay hokwe hane lokriy ha pa. Mo Antipas, hano ok ke mesor-lwayr-uwr se yier Satan hiy ma lwayr serey lokin kwor okrue liok, hunkwe hane lokriy ha pa.

¹⁴Sawk hakwe hne ok har senkin kiy-me ley, hakwe kar ley pey, payhokuaw, unsaney Balam so yor me ma nakruok kraiy homkwe hne nion non-wak. Balam hiykwe, Balak se yor piap-araw Israel me mon kuayk ey me hiymon sorasor. Yor somokwe senkin, Balak hiykwe Israel-uwrso me ayay-pion okrei-god me ma naws kow seme me-sasay a nok, yokun nweyh kane yor ke nak-me-sasay mon.^q ¹⁵Seyr liy-liy-aw, uwrso har Nikolas so hiymon-sorasor-yor me ma pyay mokwe, hunkwe ipan lon wayr. ¹⁶Hunkwe hno yor piap-araw ko me kwa kankoum ne. Sa hunkwe ma-kankoum ne pa lwak ankin, hakwe hno owh mon saw-e nok, unsaney seme lono ok, aw-seik hano woki mon ma lwak sohiy non.^r

¹⁷Uwr nweyk non hiykwe ok, Niohney hiy sios me ma mekow seme kwa lonuayk. Uwr, aw-owk yaprue lowk ankin, hakwe hye naw-mana ma lwak sue seme kow-a ey. Seyr hakwe hyekwe mein weyspey uru iwon non ma nak-mey se kow ey. Uru sohokwe uwr ma lonok hiykiaw-aw nonkway.”^s

Mamey sios Taiataira ko se ma mey kow hok non

¹⁸“Kwa mey kow ha, ensel sios Taiataira ko se.

Ok omokwe God so Ney norwayo, nene ya eyn-aw ma krikri yar, seyr sune, bras mnow-a-mnow se hieyn ma lwak so.^t ¹⁹Hakwe nonkway, hno mey lowpwarowp mokwe. Hwon uron-pi ko-ar ma lwak o, hno nan kiykiy-ay-yor o, hwon uwrso me ma hiy-mon o, seyr hno lorok-kraiy-

^o 2:10 2 Ti 4:8; Je 1:12 ^p 2:11 MHO 20:14; 21:8 ^q 2:14 Nam 31:16; 2 Pi 2:15

^r 2:16 MHO 3:11 ^s 2:17 Kis 16:14-15; Jon 6:48-50 ^t 2:18 MHO 1:14-15

wayr-yor o, somokwe hakwe nonkway. Seyr hakwe senkin nak-nonkway, peyr-mon kokwe hunkwe mey kraiar enkin ma meio eyn, meio pa.

²⁰Sawk hakwe hne ok kamon senkin kiy-me ley, hakwe kar ley pey, payhokuaw, hunkwe sa Jesebel, hok hokiaw-ayay God so profet ok ma me ke ipan lon meio. Hano mey-uwr mokwe hoko hiymon-sorasor-yor non mon ok-hyan-a-hyan, hom yokun nweyh kane e, seyr ayay okrei-god me ma naws kow seme la e.”

²¹Hakwe hokekwe enekwei papo kow, hoko yor piap-araw ko me ma-kankoum ne ey hokwe, sawk hokwe hoko yokun nweyh kane yor sokwe lokriy ha e mon pey. ²²Sawk kwa lonuayk, hakwe hoke kokwe peik mon wak ey. Uwrsa homkwe yor piap-araw hoke nion ma mon seme kankoum sow pa lwak ankin, hakwe senkin lon ey. Hakwe hoke o, uwrsa hoke nion yokun ma non-wawwaw nweyh kane sohom o, low, ya non nak-oum ey me kow. ²³Seyr hakwe hoko ney lowpwarowp me nak-okin kwor say ok. Hakwe senkin sehe lon ey, payhokuaw, sios lowpwarowp homkwe senkin ka nonkway e, hakwe uwrsa mo uron ko o, hmo mawkhaw ouon ko o, seme Lira-nonkway-uwr hiy non. Sa hakwe hmo prueyn prueyn-aw mokwe mey, hom ma meio mo meir liy-liy-aw ma-nakway ey.” ²⁴Sawk Taiataira mo sios-uwrsa har ama, homkwe hiymon-sorasor-yor piap-araw sohok ko meyki ley pa. Seyr mon sorasor nonkway pa, ok, uwr har hom senkin ma me kokwe, ‘Satan so ouon-aw-ok ouon-ar ko’. Hakwe hme kokwe low kamon, low hom ma lway sohom mo eir mon liy manak-yay low-a-low ley. ²⁵Homkwe yor yaprue hmo mon ma lwak sokwe-aw kwa nakruok kraiy, senkin-awaw, ha nuw-e.”

²⁶Uwr, aw-owk yaprue ma lowk o, seyr mey hano uron ko me-aw ma meio wayr-wayr o, enekwei pariawey hiy lousne, uwr senkin somokwe, hakwe krai liy-liy-aw ipey-ar, ha hano Aio so mon ma lonok se kow ey, kipay lowpwarowp me hiy-wayr ey hokwe. ²⁷Krai hiy-wayr ey sohokwe, hakwe Aio hiy hane ma kow, senkin ma-sahre kow ey, uwr senkin se.

“Kipay lowpwarowp mokwe hiykwe ain-ho non hiy-wayr kraiy ey.

Seyr hmeuwe ain-ho sohiy non lokin hou-say sohuan sohuan ey,
yowr ki non ma meio se hieyn.”

Sng 2:8-9

²⁸Hakwe seyr hnekwe napuar aiopey hay, leisnon ma lorok nerie se kow ey.” ²⁹Uwr nweyk non hiykwe ok Niohney hiy sios me ma mekow seme kwa lonuayk.”

Mamey sios Sardis ko me ma mey kow hok non

3 ¹“Kwa mey kow ha, ensel sios Sardis ko se.

Ok omokwe Uwr, God so Niohney iha sirom mu nareysyar non o, seyr napuar iha sirom mu nareysyar non o, hyo ok. Hakwe nonkway,

” 2:20 1 Kin 16:31; 2 Kin 9:22 2:23 Sng 7:9; Jer 17:10; MHO 20:12-13 * 2:25 Sng 7:9; Jer 17:10 * 2:28 MHO 22:16

uwrsa homkwe hno yor mokwe su ma lwayr se hieyn lira me, sawk hakwe mey, hwon ma meio somokwe, papo nonkway, hunkwe papo lokrue.^y ² Saw-oksian nok. Yor yaprue har ma kor-wak hain sohom o, seyr ma lokrue pror kreik e ma mon sohom o, seme kwa manak-mon kraipakrai. Payhokuaw, hakwe senkin lira, yor hwon ma mon somokwe, peyr hano God so nene mon kokwe mnow-mnow-aw lwak pey. ³ Kwa manapanan, paraw hne ma hiy-mon sorasor seme, seyr ok paraw hwon ma lonuayk seme. Hmo meyki ley nok, hno yor piap-araw me kankoum sow hain. Hunkwe loksian lopa lwak ankin, hakwe yokun-uwr se hieyn le, seyr hunkwe enekwei ha le ey hokwe nonkway lopa.^z

⁴ Sawk hmo uwr har Sardis ko homkwe, hmo klos mokwe mon seipasei pa. God hiykwé hme kokwe hom orki lopa ma lwak me yaprue lira, sa homkwe hane nion klos weyspey me-aw seme lie nak-anio sayok ey.^a

⁵ Unsaney aw-owk yaprue lowk ankin, hiykwé klos weyspey senkin me ya lie a. Seyr hakwe hmo uru sa-u mamey su lwayr ey ko mokwe mon-say lopa. Hano Aio so inour mon o, seyr hyo ensel mo inour mon o, hakwe senkin me-kumay kow ey, homkwe hano.^b ⁶ Uwr nweyk non hiykwé ok, Niohney hiy sios me ma mekow seme kwa lonuayk.”

Mamey sios Filadelfia ko me ma mey kow hok non

⁷ “Kwa mey kow ha, ensel sios Filadelfia ko se.

Ok omokwe Uwr pekneyweys-ar o, seyr ok-arar ma lwak o, hyo ok. Hiykwé Devit so ki se nakruok. Yerki hiy kampi ankin, uwr prueyn liy ma-piaray ley, seyr hiy piaray ankin, uwr prueyn liy ma-kampi ley.^c

⁸ Hakwe nonkway, weynpaweyn hwon ma mon somokwe. Seyr hakwe nonkway, hunkwe krai-ney non. Seyr hunkwe hano hiy-mon sorasor yor ko meyki po ley, seyr hunkwe hano uru se mey-a-mey me pey. Hakwe seyr yerki kokwe hno inour mon po kiy-kampi yay kow, sawk uwr prueyn liy ma-piar-ay ley.^d ⁹ Kwa lonuayk, okrei-uwr sa Satan so, hom homkiaw-ayay Juda-uwr-ok ma me-loior somokwe, hakwe hno sune mon me-sasay kampueys won-sowkway ey. Uwr somokwe Juda korey, sa okrei-uwr somokwe liy nonkway, hakwe hne uron-pi ko-ar nuw-wak.^e

¹⁰ Hano me-kupaku-ok, hwon ki erey mon lorok kraiaiy ey hokwe, hunkwe meyki po ley. Low senkin senkin uwrsa lowpwarowp me mon ir ey, ki erey lousne ankin, hakwe hnekwe liy-liy-aw sehe ma-nakruok kraiaiy ey.^f

¹¹ Hakwe peypey le ey korey. Hunkwe payay se nakruok e, hunkwe kwa nakruok kraiaiy. Sawk hno makwey-kokway ke uwr prueyn hiy kahya way lak.

^y 3:1 MHO 1:4,16 ^z 3:3 Mat 24:43-44; MHO 16:15 ^a 3:4 Ju 23 ^b 3:5 Kis 32:33; Mat 10:32; Luk 12:8 ^c 3:7 Ais 22:22 ^d 3:8 1 Ko 16:9 ^e 3:9 Ais 45:14; 49:23; 60:14
^f 3:10 Luk 21:19; 2 Ti 2:12

¹²Unsaney aw-owk yaprue lowk ankin, hakwe hyekwe a-nop-i aiopey hay se hieyn swaprein kaw k harok ey, hano God so a pekneyweys mon kokwe. Hiykwe God so a sehe liy lokriy hain ley. Hakwe nop-i sohiy so owh mon kokwe, hano God so uru o, hano God so taun so uru o, seme mey iarok ey. Taun sohokwe Jerusalem iwon, hano God so owh ko se ma lay-nak-aye ey hiy non. Hyo owh mon kokwe seyr hakwe hano uru iwon se nak-mey kow ey.⁸ ¹³Uwr nweyk non hiykwe Niohney so ok, sios me ma mekow seme kwa lonuayk.”

Mamey sios Laodisia ko me ma mey kow hok non

¹⁴“Kwa mey kow ha, ensel sios Laodisia ko se.

Ok omokwe Uwr, Ok-ar ma me o, seyr God so ok-ar-ok ke mesor-wayr-uwr o, hyo ok. Hiykwe omeme lowpwarowp God hiy ma mon-hre mo meyk-arar hiy non. ¹⁵Mey, hwon ma meio mokwe, hakwe papo nonkway. Hunkwe weyp lwak pey, seyr hunkwe ya-ar se hieyn loum pey. Mo hwon weyp-aw lwak hi, mo hwon ya se hieyn ma loum hi, sohokwe piap-araw-ar korey.^h ¹⁶Sawk hunkwe weyp lwak pey, seyr ya ke hieyn loum pey, sawk hunkwe sowpwareney kor-oum hniyhniy. Hwon senkin ma lwak se hokuaw kokwe, hnekwe hakwe hano woki ko se lopron-say ha ey. ¹⁷Hunkwe senkin me, ‘Hakwe omeme poya-poya non, seyr hakwe eir mon lwak. Hakwe payay se ma-lohna sow ley.’ Sawk hunkwe kiy-ira nonkway pey. Hunkwe piap-araw-araw, nuw-ey kwopakwo, omeme lopa, apaw-hro, nene kopyo.ⁱ ¹⁸Hakwe hne senkin kiyhiy-me now-a-now. Hunkwe hano gol, ya mon ma leynow mnow-a-mnow me kwa nakway, suw hunkwe omeme ihey-ar kraiar non liy lwak. Seyr klos weyspey me kwa nakway, hno owh, apaw ma nak-anio owh-mar owh-mar yay sehe nak-ie hiyhiy ey hokwe. Seyr wel nene ko se nakway nok, nene mon neyr, suw hunkwe liy lira.^j

¹⁹Uwrsa, ha uron-pi ko-ar ma lwak somokwe, hakwe lonkuwrowp anok anok. Hnekwe hakwe mo sehe me, hunkwe hno weynpaweyn piap-araw me ma kankoum sow hain sohokwe, okar okar-aw kwa nuw-mon kraiaiy.^k ²⁰Kwa lonuayk, hakwe yerki-awei mon yerki-pokre ke liarok okin koko. Uwr prueyn hano wouk-ok ke lonuayk kampi ankin, hakwe hyo a mon lyawriy nok, hye nion ayay non-a ok. Hiy seyn, hane nion non-a.^l ²¹Uwr, aw-owk yaprue lowk ankin, hakwe hyekwe hane nion siraw-aw hano sia-king mon isay iwak ey, paraw ha aw-owk yaprue ma lowk, seyr ha Aio se nion hyo sia-king mon ma liwak senkin. ²²Uwr nweyk non hiykwe, ok, Niohney hiy sios me ma mekow seme kwa lonuayk.”

Sia-king nonkumey ko hok non

4 ¹Sohiy so meyki hokwe, hakwe sawk senkin makiy-ira, yerki-pokre nonkumey ko kokwe papo kampi iarok. Seyr wouk-ok seik-saw-

⁸ 3:12 Ais 62:2; 65:15 ^h 3:15 Ro 12:11 ⁱ 3:17 Luk 12:21; 1 Ko 4:8 ^j 3:18 Ais 55:1; MHO 4:4 ^k 3:19 1 Ko 11:32; Hi 12:6 ^l 3:20 Jon 14:23

hu se hieyn ma lwoun, ha peyr-mon ma lonuayk, hiy hane makiy-me, “Erey lie e, hakwe hne mesair kow ley, ompay-ompay omok lousne ey me.”^m ²Peypey lopa, hanekwe sawk Niohney hiy kiynuw-wanohyay. Nonkumey mon kokwe, hakwe sawk sia-king kamon, hano inour mon lwak ke kiynuw-ira. Uwr prueyn hiykwe sia-king serey liwak.ⁿ ³Uwr sohokwe mein jaspa o, konilian o, hme hieyn nuw-ok-sanweyr-anweyr yar. Unameioku, mein emeral ke hieyn hokwe sia-king ke nuw-awndiy kaw.^o ⁴Sia-king aiopey kokwe, sia-king sune seys, iha seys, iha-ihaw hom nakrok-kay awndiy kaw. Seyr sia-king somokwe sios makwey-uwr sune seys, iha seys, iha-ihaw hom liwak sir. Homkwe omeme weyspey me-aw lie. Seyr king mo makwey-kokway gol non ma meio mokwe, hmo makwey mon lwak liyay.^p ⁵Sia-king ko kokwe sawk, eiwa hom lok-sanweyr-anweyr, nompow aiopey hay hom lwoun kaw owk-mniy-ma-mniy merie merie. Sia-king ko inour mon kokwe lam iha sirom mu nareys-ar non hom nuw-yar nekie nekie. Lam somokwe God so Niohney iha sirom mu nareys-ar non hom non.^q ⁶Sia-king ko inour mon kokwe hu kamon, sour-yawp-ar, kaw-ir ke hieyn ma lira sakeyn sakeyn ha hiy lwak. Hu sohokwe oro-araw.

Seyr sia-king ko por ererey mokwe ay iha-ihaw su ma lwayr homkwe serey nakrok awndiy kaw. Ay iha-ihaw su ma lwayr sohom inour mon o, hmo meyki mon o, nene homkwaw nuw-kreyr hriykw hriykw.^r ⁷Ay peyr ko hokwe laion se hieyn lira. Ay, laion so meyki ko hokwe, bulmakau-eyr se hieyn lira. Ay, bulmakau-eyr so meyki ko hokwe, iwar mo ine-maku se hieyn lira. Ay meyki-ar ko hokwe, wayp ma sian se hieyn lira. ⁸Ay iha-ihaw su ma lwayr sohom mo kamon kamon-aw mo someykyow mokwe, sankaw lwak, iha sirom pruw non. Seyr hmo ow h mokwe nene homkwaw nuw-kreyr hriykw hriykw, hmo someykyow ouon seyn, nene homkwaw nuw-kreyr liyay. Eypok arawh, eypok arawh, homkwe yaih lowk korpe korpe pey. Homkwe senkinaw-aw nuw-owk wayr-wayr:

“Pekney-weys, pekney-weys, pekney-weys hokwe, God Hakamay, Krai Lowpwarowp non hiykwaw. Hiykwe peyr-ar ko, seyr pokon ko, seyr ya le a.”^s

⁹Ay ihaiha-aw su ma lwayr somokwe, uwr, sia-king mon ma liwak, seyr ma lwayr peyow peyow se senkin me-kuw, hiykwe seirpey-ar, seyr ayaw-ar nuw-wak, seyr me-ihay-ok mokwe hiykwaw ka lonok. Hom senkin lon mokwe, ¹⁰sawk sios makwey-uwr, sune seys, iha seys, ihaiha-aw homkwe, uwr sia-king mon ma liwak, seyr su ma lwayr peyow peyow so inour mon pamuow kampueys won-sowkway me-ihay. Homkwe hmo

^m 4:1 MHO 1:1,10 ⁿ 4:2 Ais 6:1 ^o 4:3 Ese 1:28 ^p 4:4 MHO 3:18 ^q 4:5 Ese 1:13; Sek 4:2
^r 4:6 Ese 1:5-10,22; 10:14 ^s 4:8 Ais 6:2,3; Ese 1:18; 10:12

makwey-kokwey me sia-king ko inour mon kama-seyn yay sowkriy nok, senkin nak-me-ihey ok,^t

¹¹ “Hunkwe hromo Hakamay, seyr hromo God. Panpaniowni o, uru ayaw mon ma lwak o, seyr kraik o, hunkiwaw-aw kwa nak-wayr e. Payhokuaw, omeme lowpwarowp mokwe hwon mon-hre. Seyr omeme omokwe hno uron arian non mon-hre nok, inaw mesay wayr.”

Sipsip-ney hiy God so mamey ma lok-sarohon ke ma kampi ira hiy non

5 ¹Sohiy so meyki hokwe, hakwe sawk senkin ma-lira, uwr, sia-king mon ma liwak hiykwe, mamey ma lok-sarohon ke nakruok, hyo iha-sayar mon kokwe. Ok mokwe muwmon muwmon, po nuw-meyamey, seyr, mamey sohok ko kopi mokwe, kendol-lor iha sirom mu nareys-ar non non nak-okin nasnas say kraipakrai.^u ²Seyr hakwe ensel seirpey-ar se nak-ira, hiykwe wouk-ok aiopey hay non senkin me-sanion sow, “Uwr yaprue ihey, kendol-lor iha sirom mu nareys-ar non me kamane sow ey, seyr mamey ma lok-sarohon ke kampi ey hokwe, posokwaw so?” ³Sawk nonkumey mon o, ki mon o, seyr ki ouon mon o, mamey ma lok-sarohon sokwe kampi ira ey hokwe, uwr prueyn yaprue ihey-ar lopa. ⁴Ha senkin lira menkin, hakwe sawk ehey kraiar sehe nuw-yuk, payhokuaw, uwr prueyn yaprue ihey-ar lopa, mamey ma lok-sarohon sokwe kampi ira ey hokwe. ⁵Sa hanekwe sawk sios mo makwey-uwr prueyn hiy kiy-me, “Hunkwe ehey peie lyuk o, kwa lira, laion Juda mo uwr-ku ko, Devit so ney-nona hiykwe uwr seirpey, aw ma lono akre akre hiy non. Hiykwe mamey ma lok-sarohon, kendol-lor iha sirom mu nareys-ar non ma nak-okin nasnas-say sokukwe, liy kampi.”^v

⁶Sohiy so meyki hokwe, hakwe sawk senkin lira, Sipsip-ney kamon hiykwe sia-king ko ompok mon liarok. Sipsip-ney sohokwe, ay iha-iha-aw su ma lwayr o, sios mo makwey-uwr o, hom nuw-awndiy kawkw. Sipsip-ney hokwe ma lokin kwor okruwe se hieyn lira. Hiykwe kon iha sirom mu nareys-ar non, seyr, nene iha sirom mu nareys-ar non. Somokwe, God so Niohney iha sirom mu nareys-ar non kipay lowpwarowp ki ko mon ma me-ha hom non.^w ⁷Sipsip-ney hiykwe sa le nok, mamey ma lok-sarohon ke lway, uwr sia-king mon ma liwak so iha sayar ko ke. ⁸Hiy lway menkin, ay ihaiha-aw su ma lwayr o, sios makwey-uwr iha seys, sune seys ihaiha-aw o, homkwe, Sipsip-ney sohiy so inour mon pamuow kamapueys hawon sowkway. Hmo prueyn prueyn-aw homkwe, nowpay kamon gita ke hieyn non, seyr yowr gol non ma meio, seme nakruok. Yowr somokwe yakuw prawk yaprue mokwe woki nuw-wak. Yakuw prawk yaprue somokwe

^t 4:10 MHO 7:10,15; 19:4 ^u 5:1 Ais 29:11; Ese 2:9-10 ^v 5:5 Stt 49:9; Ais 11:1,10; MHO 22:16 ^w 5:6 Sek 4:10; Jon 1:36; MHO 13:8

kristen-uwrsa mo mesopok hom non.^x ⁹Seyr homkwe yayh kamon senkin nak-me owk,

“Hunkwe yaprue ihey-ar sora, mamey ma lok-sarohon ke sehe lway, seyr hunkwe kendol-lor ma nak-okin nasnas say kraipakrai me seme kamane sow. Payhokuaw, hnekwe papo lokin kwor krue, seyr hno nioh hokwe uwrsa uwr-ku senkin senkin ko o, wouk-ok senkin senkin non o, seyr uwrsa kipay lowpwarowp ko o, seyr owh-ohi senkin senkin non o, po nakway huonokyaw prosue, God so owh mon ma-le ey mokwe.^y

¹⁰Hunkwe uwrsa seme kokwe God so mey-uwr pris orhey non po mon wak, seyr king me hieyn po mon wak, ki ehe hiy-wayr ey hokwe.”^z

Sipsip-ney so uru se ma lowk nakie me-ihey hiy non

¹¹Sa ha ma-sahre ira menkin, hakwe sawk ensel poya-poya mo wouk-ok me lonuayk. Hmo sor-meir mokwe sankaw, tausen tausen, seyr milion milion. Homkwe sia-king o, ay iha-ihaw su ma lwayr sohom o, seyr sios makwey-uwr sune seys iha seys ihaiha-aw me nakrok awndiy kawk.^a

¹²Seyr yayh kokwe aiopey hay senkin me-kuw,

“Sipsip-ney ma lokin kwor okrue hokwe, yaprue ihey-ar nuw-wak, krai o, omeme ihey-ar poya poya o, nonkway yaprue o, hay ipey-ar o, uru ayaw-ar ma nuw-wak o, panpaniowni o, me-ihey-ok o, seme lonokyaw ey hokwe.”

¹³Seyr hakwe senkin lonuayk, ompay inaw ma lwak nonkumey ko, ki ko, ki ouon ko, seyr sour-yawp-ar ko, ompay lowpwarowp serey ma lwak somokwe yayh senkin me-kuw,

“Me-ihey-ok o, uru ayaw-ar ma nuw-wak o, panpaniowni o, hay ipey-ar o, somokwe uwr sia-king mon ma liwak o, seyr sipsip-ney o, hoho mon-aw ka lwak peyow peyow.”

¹⁴Ay ihaiha-aw su ma lwayr somokwe sawk senkin lonuayk me, “Ok-ar,” seyr sios makwey-uwr homkwe pamuow kampueys nok, nak-me-ihey.

Sipsip-ney hiy kendol-lor me ma kamane sow hiy non

6 ¹Seyr hakwe Sipsip-ney se-aw nuw-ira kraipakrai, hiy kendol-lor iha sirom mu nareys-ar non mo peyr-ar ko se kane sow se. Hiy peyr-ar ko se kane sow menkin, hakwe sawk ay ihaiha-aw su ma lwayr mo prueyn hiy nompow se hieyn lamniy me se lonuayk. Hiykwe senkin me, “Oue.”^b

²Ha ma-sahre-ira menkin, hakwe sawk hos weyspey hiy lwak se lira. Uwr prueyn hos se nak-anio ey hiykwe ompow non nak-iwak, seyr

^x 5:8 MHO 8:3-4; Sng 141:2 ^y 5:9 Sng 33:3; 40:3; 96:1; 98:1 ^z 5:10 Kis 19:6; Ais 61:6; MHO 1:6; 20:6 ^a 5:11 Dan 7:10; Hi 12:22 ^b 6:1 MHO 4:6; 5:1

hyekwe king so makwey-kokway ke nak-yay kow. Hiykwe sawk hos non nak-sau nok, uwr seirpey, aw ma lono akre akre se hieyn, kipay har me ma-lono swakakar e.

³Sipsip-ney hiy kendol-lor kamon ke ma-kane sow menkin, ha sawk ay ihaiha-aw su ma lwayr mo kamon hiy senkin makiy-me se lonuayk, “Oue.” ⁴Sa hos kamon hiy ar-ousne ha, hos sohokwe oupuey-araw. Uwr, hos sehe nak-anio ey se kokwe, hay ki se aw mon ono ey ke kow, uwr hom homkiaw-ayay lokin kwor-ma-kwor ey hokwe. Hye kokwe aw-seik aiopey hay ke kow.

⁵Hai, Sipsip-ney hiy kendol-lor krompri ke ma-kane sow. Hakwe sawk, ay su ma lwayr mo krompri hiy senkin me se lonuayk, “Oue!” Ha ma lira hokwe, hakwe sawk hos orpey hiy lorok se lira. Uwr, hos sehe nak-anio ey hiykwe skel meir ey ke nakruok. ^c ⁶Sa hakwe uwr-wouk-ok kamon ke hieyn se lonuayk, ay iha-iha-aw su ma lwayr mo ompok mon ar-meha se. Wouk-ok sokukwe senkin me, “Ara, uwrsa homkwe ayay mokwe mein-owon aiopey hay non nakway ey. They mo naw wit mokwe, kilo kamon-aw hokwe sankaw nakway ey, meinowon eypok kamon-aw ma meio lonok ko. Sawk ihay mo naw bali mokwe, kilo krompri mokwe sankaw nakway ey, meinowon eypok kamon-aw ma meio lonok ko. Sawk hunkwe uwrsa mo wel o, wain o, peie mon piapay o.”

⁷Sei, Sipsip-ney hiy kendol-lor iha-iha-aw ke ma-kane sow. Ha makiy-onuayk, ay iha-iha-aw su ma lwayr mo pariawey hiy senkin me se, “Oue!” ⁸Ha ma lira hokwe, hakwe sawk hos wouknow-si eyn hiy lorok se lira. Uwr, hos sehe nak-anio ey so uru hokwe, Lokrue. Lokrue-mo-yier hokwe Lokrue so meyki-ar kiynuw-pyay ha. Hehe kokwe krai se kow, ki iha-iha-aw ma lokima okima ha mo kopi kamon se mon piapay e. Sa hohkwe ki kopi sohokwe aw mon ono, siowp aiopey hay mon okrue, peik piap-araw mon wak, seyr ay-kaman piap-araw me me-hruw. ^d

⁹Senkin-awaw, Sipsip-ney hiy kendol-lor iha sirom ke ma-kane sow. Ha sawk uwrsa, God so ok ke ma mesor sanion sow, seyr God so mey hom ma meio me hokuaw ma lokin kwor-ma-kwor okrue ha mo wa hom alta ouon mon lwak me lira. ¹⁰Homkwe wouk-ok aiopey hay non senkin me, “Hakamay Seirpey-ar ara, hunkwe pekney-weys, seyr okar okar-ar. Hunkwe uwrsa ki ko mokwe ya korey korey sor anon anon a? Seyr hunkwe unsaney hreme ma lokin kwor-ma-kwor okrue mokwe, enekwei pohiy sok manon-sawkriy kow ey so, hromo nioh mokwe?” ¹¹Sa uwrsa sohom mo prueyn prueyn-aw mokwe klos weyspey me linon kow nok, nak-me kow, “Homkwe peyr kwa kor-iwak nieys porpor naruok, uwrsa ma lokin kwor okrue mo meir hiy nuw-ie sompay sompay. Uwrsa

^c 6:5 Sek 1:8; 6:1-6 ^d 6:8 Jer 15:1-3; Ese 5:12,17; 14:21

somokwe hmo mey-wayh, hmo uwr eynay, hme hieyn ma lokin kwor okruwe hom non.”^e

¹² Sipsip-ney hiy kendol-lor iha sirom pruw non ke makiy-kane sow menkin, kina aiopey hay hiy kiynuway swarwor-arwor wei-a-wei nok, ey hiy orpey kiynuway-kankoum, klos orpey krwipakrwi ke hieyn. Yeyn hok nioh nioh-aw kiynuway-oksahriy sow.^f ¹³ Napuar non ko homkwe ki mon makuayk-sa-kuayk, fik-i eypro howniy aiopey hay hok ma lway li-li say me hieyn.^g ¹⁴ Non hok kiynuway-oksarohon won-kwawk sue, mamey ma lok-sarohon ke hieyn. Mnuw lowpwarowp o, oion-waw lowpwarowp o, hom ley neyney lowpway, hmo yop arian mon ma-lwak pa.^h

¹⁵ Sawk king lowpwarowp ki ko o, uwr uru aiopey hay non o, aw-uwr mo hakamay o, seyr uwr omeme poniy poniy non o, hay ipey-ar non o, seyr mey-uwr puraw o, uwr, liaup-uwr lopa o, homkwe nuw-hakan wonkreik sue, peir-saw ouon mon, seyr mein-pow ouon mnuw ko mon.ⁱ ¹⁶ Homkwe mnuw me o, mein-pow me o, senkin me, “Homkwe hromo owh mon makuayk sakuayk nok, hreme swakuwmay sue, uwr sia-king mon ma liwak hiykwe sawk hreme lira lak, seyr Sipsip-ney hiykwe sawk hreme aw-mar lie lak.^j ¹⁷ Payhokuaw, hoho aw-mar ipey-ar lie enekwei hokwe ehe, seyr posokwaw non-saiar a.”^k

Israel uwrsa 144,000 hom God so meir se ma lonok hom non

7 ¹ Ha owhnan seme kiy-ira ha lowpway menkin, hakwe sawk ensel iha-ia-aw ki ohiy so por iha-ia-aw mon nakrok-kay me lira. Homkwe howniy iha-ia-aw me nekie sous huon, ki o, sour-yawp-ar o, now o, hme lway huwhuw ame.^l ² Ha sehe kiy-ira ha lowpway menkin, sawk ensel prueyn, ey kaie ko se le se makiy-ira huon. Hiykwe lwayr peyow peyow God so kendol-lor non. Hiykwe sawk ensel iha-ia-aw, krai, ki o, sour-yawp-ar o, seme mon piapay e ma kow me wouk-ok aiopey hay non senkin me, ³ “Homkwe ki o, sour-yawp-ar o, now lowpwarowp o, peyr peie saw-mon piapay o. Peyr hromkwe God so mey-uwr lowpwarowp mo ine-maku mokwe kendol-lor non lokiamau kreik kow ha pa.”^m ⁴ Hanekwe sawk senkin mekow, uwrsa mo meir kendol-lor non ma lokiamau kreik mokwe sankaw, 144,000. Somokwe Israel mo uwrsa uwrku iha seys mu nareysyar non hom ma kekie nona nona ne hom non.ⁿ

⁵ Uwrku kamon kamon-aw mo meir mokwe sankaw, Juda so uwr-ku ko mokwe, 12,000. Ruben so uwr-ku ko mokwe 12,000. Gat so uwr-ku ko mokwe 12,000.

⁶ Aser so uwr-ku ko mokwe, 12,000. Naptali so uwr-ku ko mokwe 12,000. Manase so uwr-ku mokwe 12,000.

^e 6:11 MHO 7:9,13; 19:14 ^f 6:12 Mat 24:9; Ap 2:20; MHO 11:13 ^g 6:13 Ais 34:4

^h 6:14 MHO 16:20 ⁱ 6:15 Ais 2:10,19,21 ^j 6:16 Luk 23:30 ^k 6:17 Jol 2:11; Mal 3:2

^l 7:1 Jer 49:36; Dan 7:2 ^m 7:3 Ese 9:4; MHO 9:4 ⁿ 7:4 MHO 14:1,3

- 7 Simeon so uwr-ku ko mokwe 12,000. Livai so uwr-ku ko mokwe 12,000. Isakar so uwr-ku ko mokwe 12,000.
 8 Sebulun so uwr-ku ko mokwe 12,000. Josep so uwr-ku ko mokwe 12,000. Benjamin so uwr-ku ko mokwe 12,000.

Uwrsa popua hay hom God se ma swa-hokruw me-ihey hom non

9 Sohiy so meyki hokwe, ha sa uwrsa popua hay hok nuw-hokruw konpakon kaw k ke lira. Hmo meir mokwe uwr posokwaw sor meir-yay ley. Uwrsa somokwe ow-h-ohi senkin senkin, uwr-kayn senkin senkin, kipay senkin senkin, wouk-ok senkin senkin non ko me le-nene. Homkwe sia-king o, sipsip-ney o, hoho inour mon nakrok-kay, seyr klos weyspey me-aw nak-ie liyay, seyr pokriy-ma me nak-nakruok, hmo iha mon kokwe. 10 Homkwe wouk-ok aiopay hay non senkin nuw-me,

“Huonok-prosue-yor kokwe hromo God, sia-king mon ma liwak o, seyr Sipsip-ney o, hoho mon le.”^o

11 Ensel lowpwarowp homkwe sia-king o, sios makwey-uwr o, ay ihaiha-aw su ma lwayr sohom o, hme nakrok awndiy kaw k nok, ine ki mon sia-king ko inour mon kuayk won sowkway me-ihey, God se. 12 Hom me, “Ok-ar! Me-ihey-ok o, panpaniowni o, mawkhaw ihey-ar o, kar me ey ok o, uru ayaw-ar o, kra i o, seyr hay ipey-ar o, God hiykwaw ka nak-wayr peyow peyow. Ok-ar!”^p

13 Sios mo makwey-uwr prueyn hiyke sawk hane senkin mesopok, “Uwrsa klos weyspey meime me ma lie omokwe posokwaw mo, seyr perey suko me le mo?”

14 Ha kiy-onuayk me, “Ara, hakwe nonkway korey, hunkwe nonkway.”

Hiy sa hane senkin me, “Uwrsa somokwe low piap-araw aiopay hay ko ouon ko me ma lousne-sa-ousne ha hom non. Homkwe hmo klos meipey mokwe Sipsip-ney so nioh non po peyryapeyr weyspey.”^q

15 Homkwe God so sia-king ko inour mon seme nakrok-kay, seyr hye me-ihey mey me-aw meio kow, eypok arawh, eypok arawh, hyo a pekney-weys mon. Uwr, sia-king mon ma liwak hiykiaw kokwe ohriar non-wak sous-a-sous ey, hmekwe. 16 Uwrsa somokwe siowp ma-lokrue lopa, seyr hu krah-ma-krah lopa. Seyr ey-li o, ya-li senkin senkin o, hme ma-loum pouk-ma-pouk lopa.^r 17 Payhokuaw, Sipsip-ney, sia-king ompok mon ma lwak hiyke hmo naykih-ar lwak ey. Hiyke hmekwe ki-saw-hu, su ma lwayr peyow peyow ey mon hiy-anok anak nok ey. Seyr God hiyke hmo ehey-hu lowpwarowp nene ko me noh ahahay kow ey.”^s

^o 7:10 MHO 4:10 ^p 7:12 MHO 5:12 ^q 7:14 Dan 12:1; Mat 24:21 ^r 7:16 Ais 49:10

^s 7:17 Sng 23:2; Ais 25:8; MHO 21:4

Kandol-lor iha sirom mu nareysyar ke ma kane sow pariawey hok non

8 ¹Enekwei Sipsip-ney hiy kendol-lor iha sirom mu nareysyar non ko pariawey-ar ke kane sow menkin, nonkumey hiykwe sawk kumays, aua mon-kopi sankaw lwak ha.

²Hakwe sawk ensel iha sirom mu nareysyar non God so inour mon ma nakrok seme lira. Seyr hme kokwe hu lou ey mokwe iha sirom mu nareysyar non sankaw lopri kow.

³Ensel prueyn plet gol non ma meio ke ma nakruok hiykwe le nok, alta ohriar mon omnak-iarok. Hyekwe omeme prawk yaprue non mokwe kraiar po kow. Somokwe kristen-uwrsa mo mesopok me nion alta gol non ma meio, sia-king ko inour mon ma lwak serey nak-naws prawk kow ey.^t

⁴Prawk yaprue sohom mo yakuw o, kristen-uwrsa mo mesopok o, ensel so iha ko me leyh ie, God so inour mon. ⁵Sa ensel hiykwe plet ke lonok nok, ihuan ya non me lough kaww nok, ki mon kyornak-swasow ha. Hiy kyornak-swasow ha menkin, sa nompow aiopey hay hom lwoun kaww owk-mniy-ma-mniy merie merie, eiwa hom kiynuw-ok-sanweyr-anweyr, seyr kina hiy ki se kiynuw-way wei-a-wei.^u

Ensel hom hu me ma lou hom non

⁶Sa ensel iha sirom mu nareysyar non hu iha sirom mu nareysyar non me ma nakruok homkwe hu seme lou e lonhan onhan koruay.

⁷Ensel peyrmaww-ar ko hiy hyo hu se kiynuw-ou menkin, sawk sueyr-hu mein me hieyn o, ya o, nioh non ma nak-onhwayh hom sueyr se hieyn-aw ki mon kiynuw-prorkuw. Ki ohiy so kopi krompri mo kopi kamon hokwe, ya hiy nuw-oum kampru yay. Now mokwe seyr meir liy-liy-aw loum-pru kreik, sawk pan lowpwarowp mokwe nuw-oum li-li say lowpway.^v

⁸Ensel prueyn hyo meyki ko hiy hyo hu se makiy-ou menkin, sawk ompay kamon mnuw kwaresi se hieyn, ya ma loum krikri hokwe, sour-yawp-ar mon nak-way swakeyn. Sa sour-yawp-ar so kopi krompri mo kopi kamon hokwe, nioh hiykwaw nuw-ka-hriysow hnuawon keyn. ⁹Ayay sour-yawp-ar mon ma lwayr so kopi krompri mo kopi kamon hokwe nuw-away lowpway, ihey mo yeyk aiopey hay sour-yawp-ar ko mo kopi krompri mo kopi kamon hokwe seyr nuwnak-mon piapay lowpway.

¹⁰Ensel prueysyar sohiy so meyki hokwe sawk ensel prueyn hiy malou. Hiy ma lou hokwe, sawk napuar kwaresi, wayar-ir se hieyn, non ko hiy kiynuw-onkansopra sow ha, sawk yawp mo kopi krompri mo kopi kamon o, ki-saw-hu mo kopi krompri mo kopi kamon o, serey maka-

^t 8:3 MHO 5:8; Kis 30:1-3 ^u 8:5 Wkp 16:12; MHO 11:19; 16:18 ^v 8:7 Kis 9:23-26; Ese 38:22; Jol 2:30

nak-anekeyn. ¹¹Napuar sohiy so uru hokwe Laroray. Hu sohom mo kopi krompri mo kopi kamon hokwe sawk laroray, seyr uwrusa poya-poya hu seme ma lowswa homkwe sa laway lowpway, payhokuaw, hu somokwe papo mon laroray.^w

¹²Ensel pruompri-ar mo meyki hokwe, sawk ensel prueyn hiy ma-lou, hyo hu se. Hiy lou menkin, ey so kopi krompri mo kopi kamon o, yeyn ko kopi krompri mo kopi kamon o, napuar mo kopi krompri mo kopi kamon o, eym-nawp lwak. Seyr eypok so kopi krompri mo kopi kamon hokwe, ey ma-lyar pa, arawh so kopi krompri mo kopi kamon seyn, eym-nawp nuw-wak.^x

¹³Ha lira nonaw, hakwe sawk wayp hiy wouk-ok aiopey hay non, non-ayaw ompok mon senkin sian yaw me se lonuayk, “Woiow, woiow, woiow, uwrusa ki ko ey, ensel pruompri-ar hom hmo hu me makiy-ou ankin, homkwe ya low penkin me lway a-ney!”^y

Hu-oxsa, yor piap-araw ma mon ousne hiy non

9 ¹Sa ensel ihaiha-aw mo meyki mon hokwe, ensel prueyn hiy hyo hu se ma-lou. Ha sawk senkin lira, napuar ki mon ma makuayk se kokwe, ki, ki-saw limon lopa so yerki se kampi ey se kow.^z ²Napuar hiy ki-saw limon lopa se kampi menkin, sa yakuw ki-saw ko hom ar-ousne-sa-ousne ha, ya aiopey hay ko yakuw me hieyn. Yakuw somokwe sawk ey o, non o, hehe nuw-mon eym krwere krwere.^a ³Pokuayp homkwe sawk yakuw ouon ko me ar-ousne sa-ousne ha nok, ki mon maka-sian yay sowkriy. Hmekwe hay mokwe kiarkiar mo hay me hieyn me kow ha.^b ⁴Pokuayp me kokwe senkin mekow ha, homkwe pan ki ko o, ompay ompay yok lowpwarowp o, now lowpwarowp o, seme peie la pror kaw k o, sawk uwrusa God so kendol-lor hmo ine-maku mon ma lokiaman kow lopa me-aw kwa peyk mane.^c ⁵Hmekwe hay uwrusa me mon okruie ey ke kow pa, sawk uwrusa mo opion opion me yeyn iha sirom-aw peyk mane nak-oum ey ke-aw kow. Uwrusa sohom mo opion opion pokuayp hom ma peyk mane mokwe, kiarkiar hom ma peyk mane me hieyn nak-oum ey. ⁶Enekwei yeyn iha sirom sohiy non kokwe, uwrusa homkwe yerki lokruie ey se pawk ey, sawk homkwe liy lirway ley. Homkwe lokruie e nanpanan, sawk lokruie hokwe hme lira hakan ey.^d

⁷Pokuayp mokwe hos aw lono e ma hokruw ondar me hieyn lira. Hmo makwey mon kokwe, makwey-kokway gol non ma monhre me hieyn eyn hom inakrok. Hmo ine-maku mokwe iwar mo ine-maku me hieyn lira.^e ⁸Hmo makwey-ohne mokwe sa mo makwey-ohne me hieyn, seyr

^w 8:11 Jer 9:15 ^x 8:12 Ese 32:7; MHO 6:12-13 ^y 8:13 MHO 9:12; 11:14 ^z 9:1 MHO 20:1

^a 9:2 Stt 19:28; Jol 2:2,10 ^b 9:3 Kis 10:12-15 ^c 9:4 MHO 7:3 ^d 9:6 Jop 3:21; Jer 8:3

^e 9:7 Jol 2:4

hmo nays mokwe laion mo nays me hieyn.^f ⁹Homkwe uron-kowp-iheyen mokwe, ain non ma meio me lie. Seyr hmo someyk-mawk-oksa mokwe, hos karis non, aw ma lowk-swanion ono me hieyn lwoun.^g ¹⁰Pokuayp somokwe orow pisolokri non kiarkiar me hieyn. Seyr hmo orow mokwe hay non, uwrsa me yeyn iha sirom senkin peyk mane nak-oum ey. ¹¹Homkwe king non. King sohokwe ensel ki-saw limon lopa se ma hiy-wayr hiy non. Hibru mo ok non kokwe ensel sohiy so uru hokwe senkin mowie, Abadon. Grik mo ok non kokwe senkin, mowie, Apolion.^h

¹²Low piap-araw peyr ko kokwe po kiy-ousne hain, sawk low piap-araw kreysyar kokwe peyr kiy-wak kwe.

Ensel iha sirom pruw non hiy hyo hu se ma lou hiy non

¹³Ensel iha sirom pruw non hiy hyo hu se lou menkin, hakwe sawk wouk-ok kamon, alta por ihaiha-aw non gol non ma meio ko se ar-me-ha ke lonuayk. Alta sokukwe God so inour mon lwak. ¹⁴Wouk-ok sokukwe, ensel iha sirom pru non hu non seme senkin me, “Hunkwe ensel ihaiha-aw, yawp aiopey hay Yufretis mon ma sakreik hnuawon sowkway seme kwa hrsorsay kow ha.” ¹⁵Ensel ihaiha-aw seme kokwe sawk seme hrsorsay kow ha. Aua sohiy o, eypok sohiy o, yeyn sohok o, seyr ya sohiy o, ensel ihaiha-aw seme kokwe mo enekwei sehe nuw-iaup kow koruay, uwrsa mo kopi krompri mo kopi kamon se lono son-say e.ⁱ ¹⁶Hanekwe senkin mekow, aw-uwr orhey non mo meir mokwe sankaw, 200 milion.

¹⁷Hos o, hos me nak-anio uwr o, ha ma lira mokwe senkin lwak, uwr mo uron-kowp-iheyen mo meyamey mokwe ya ma loum wosayk wosayk me hieyn lwak, seyr orohior o, wouknowsi o, senkin lwak. Hos mo makwey mokwe laion mo makwey me hieyn, seyr hmo woki mon kokwe ya o, yakuw o, mein-salfa ya non o, hom lousne sa-ousne.

¹⁸Uwrsa mo kopi krompri mo kopi kamon hokwe low piap-araw krompri-ar senkin, ya o, yakuw o, mein-salfa ya non o, hos mo woki ko hom lousne sa-ousne nok, uwrsa me loum away lowpway. ¹⁹Hos sohom mo hay kokwe woki o, orow o, serey lwak. Hmo orow mokwe sok me hieyn, makwey non. Uwrsa mokwe hmo orow non mon piapay.

²⁰Uwrsa har low piap-araw sohom ma lokin kwor say lopa ma lwak mokwe, hmo uron me pase ma-kankoum sow e, okrei-god hmo iha arian non ma meio me ma kampueys me-ihey mokwe. Homkwe poup o, okrei-god ma lira lopa, lonuayk lopa, lania lopa, gol, silva, bras, mein, now, sohom non ma meio mokwe pase kampueys me-ihey kane ha e.^j ²¹Seyr homkwe hmo yor uwrsa me ma lokin kwor-ma-kwor okruie o, hmo powa senkin senkin o, hmo yokun nweyh kane yor o, yokun yor o, somokwe pase ma-kankoum sow hain e.

^f 9:8 Jol 1:6 ^g 9:9 Jol 2:5 ^h 9:11 Uru sohiy so meyk-ar hokwe senkin: Mon-piapay-uwr.

ⁱ 9:15 MHO 8:7-12 ^j 9:20 Sng 115:4-7; Dan 5:23; MHO 16:9,11

Ensel o, mamey ma lok-sarohon paswaw o

10 ¹Ha sawk makiy-ira, ensel ipey-ar prueyn hiy nonkumey ko se ar-ousne ha aye se. Hyekwe waw non swakuwmay, seyr unameioku hokwe hyo makwey mon ka-ho iawon. Hyo ine-maku hokwe ey se hieyn lo, seyr hyo sune mokwe nop-i ya non me hieyn nak-iarok yar. ²Mamey ma lok-sarohon paswaw-ney hyo iha mon ma lwak sokukwe po kampi. Hiykwe hyo sune sayar kokwe sour-yawp-ar mon wosakeyn hnuarok, irayh kokwe ki mon lorok, ³sa seyn liowwr me, wouk-ok aiopey hay non. Wouk-ok sokukwe laion hom ma lanio me me hieyn. Hiy ma liowwr me so meyki mon hokwe sawk nompow iha sirom mu nareysyar hom lonuayk me. ⁴Nompow sohom ma me mokwe, hakwe sawk hmo ok me kiysaw-mey e mon liok, sa wouk-ok kamon nonkumey ko hok senkin me se lonuayk, “Nompow sohom mo ok mokwe hunkiw-aw ouon-aw kwa nak-wak, peie mey o.”^k

⁵Ensel, ha senkin ma lorok se ma lira, sune kamon ki mon, sune kamon sour-yawp-ar mon, hiykwe hyo iha sayar ke nonkumey mon ar-nakray nok,^l ⁶God su ma lwayr peyow peyow, seyr nonkumey o, ki o, sour-yawp-ar o, seyr omeme lowpwarowp serey ma lwak me ma mon-hre o, hyo uru non senkin loiow me, “Enekwei hokwe liy ma-nakruok omponay kok ley.” ⁷Sawk ensel iha sirom mu nareysyar hiy hyo hu se lou ankin, God hiykwe mey, hyo uron arian mon ouon-aw ma lwak sue somokwe enekwei sohiy non meio lowpway ey, hiy hyo mey-uwr profet me ma mekow senkin.^m

⁸Sa hakwe wouk-ok nonkumey ko, peyr-mon hane ma me, hiy ma-me se lonuayk. Hiykwe senkin me, “Kwa ley onok, mamey ma lok-sarohon, ensel sune kamon sour-yawp-ar mon, sune kamon ki mon, senkin ma lorok so iha mon ma kampi iawon sokwe.”

⁹Hakwe sawk ensel sohiy so owh mon ley nok, hye mesopok, mamey ma lok-sarohon ke hane kow e. Hiy sawk hane senkin me, “Kiy-onok nok, kiy-a, hno swaw hokwe kriy-kriy lon ey, sawk hno woki kokwe, eirpow-hu wonor se hieyn lwak ey.”ⁿ ¹⁰Ha mamey ma lok-sarohon sokwe ma kiy-onok a hokwe, hano woki kokwe eirpow-hu wonor se hieyn nuw-wak, sa ha ma lamkueyn ha hokwe, hano swaw hokwe sawk kriy-kriy lon. ¹¹Sa hane senkin kiynak-mekow, “Hunkwe profet-ok me kwa ma-mesor, weynpaweyn omok, kipay lowpwarowp me o, unsaney owh-ohi senkin senkin non me o, uwr-ku wouk-ok senkin senkin non me o, seyr king me o, hmo owh mon lousne ey mokwe.”

Uwr prueysyar, hoh ok ma mesor kumay kow hom non

11 ¹Sa hane kokwe now-ho kamon luw-luw-aw sor-mey non se lwos kow, seyr senkin nak-me kow, “Hunkwe ley nok, God so a

^k 10:4 Dan 12:4,9 ^l 10:5 Lo 32:40; Dan 12:7 ^m 10:7 Amo 3:7 ⁿ 10:9 Ese 2:8; 3:1-3

pekneyweys o, alta o, hehe kwa meir-yay. Seyr uwr̄sa serey ma kampueys me-ih̄ey sohom mo meir me nak-sor.”^o ²Sawk hunkwe God so a-yier ki apau meyk̄yay-ar ko se peie meir o, payhokuaw, a-yier meyk̄yay-ar ko sohokwe uwr̄sa God se ma nan kiykiy-ay lopa me po kow. Uwr̄sa somokwe yier pekney-weys aiopey hay sehe enekwei yeyn 42 sankaw lanio our seipasei ey.^p ³Seyr hakwe hano mey-uwr̄ prueysyar hane ma nonkway se ma mesor me kokwe krai se kow ha ey. Hohkwe unuaw liwak omeme me lie nok nok, weynpaweyn omok lousne ey me profet-ok non mesor ey, eypok enekwei 1260 sohiy non kokwe. ⁴Uwr̄ prueysyar sohokwe oliv-now pireysyar, seyr lam-sey kreysyar, ki oh̄iy so Hakamay so inour mon ma lorok hom non.^q ⁵Uwr̄sa hehe mon piapay e mon ankin, ya kokwe hoho woki ko me lousne nok, hoho awia-pow me loumpru kreik lowpway ok. Hehe kokwe unsaney posokwaw mon piapay e mon e, hmekwe yerki sohiy non mon okrue ey.^r ⁶Uwr̄ prueysyar sohokwe krai, non se piar sous ey non, sueyr hiy lows lopa lwak e, hoh profet-ok me mesor enekwei hokwe. Hohkwe krai non, hu me nioh eyn mon ousne ey mokwe. Hohkwe seyr krai non, ki se low piap-araw senkin senkin non mon piapay ey hokwe. Hohkwe enekwei kraiar mon ousne e mon ankin, hohkwe liy.^s

⁷Seyr enekwei hoh hoho mesor-kumay-ok me mesor lowpway ankin, ay kwaresi piap-araw hiykwe ki-saw limon lopa ko se ar-ousne ha nok, hehe aw non-ono swakakar okin kwor okrue ok.^t ⁸Hoho owhi-sopok mokwe taun seirpey so yerki mon non-won ey. Taun sohokwe Jerusalem, hoho Hakamay se ma nak-okin pror kaw̄k sawan hiy non. Taun sohokwe owhnan-ok non kokwe, senkin mowie, Sodom, Isip leys.^u ⁹Unsaney owh-ohi irweyk irweyk ko o, uwr̄-kayn lowpwarowp ko o, wouk-ok senkin senkin non o, uwr̄sa kipay lowpwarowp ko o, homkwe eypok krompri o, eypok kam̄on so mon-kopi o, sankaw lowk-yay-yay ira ey. Sawk homkwe me-puar ey, hoho owhi-sopok me lopru inon kreik lopa. ¹⁰Uwr̄sa ki ko homkwe kar ley ey, hehe lokrue ankin. Homkwe iray-ay lunay-a nok, wayh-wayh me nion omeme non-sawos opri ok. Payhokuaw, profet-uwr̄ prueysyar sohokwe hmekwe low ompuay kow mo.

¹¹Eypok krompri o, eypok kam̄on so mon-kopi o, sohom mo meyki hokwe, howniy su ma lwayr peyow ey God so mon ma le se ma-losiahakar kaw̄k kow. Hohkwe sa hoho oiow arian non sehe non-oksian iarok. Uwr̄sa hehe ma lira homkwe sawk seme nuw-hok krwepakrwe.^v

¹²Sa profet-uwr̄ prueysyar sohokwe wouk-ok aiopey hay kam̄on, nonkumey ko hok hehe senkin me se lonuayk, “Hohkwe erey kwa lie.”

^o 11:1 Ese 40:3; Sek 2:1-2 ^p 11:2 Luk 21:24; MHO 13:5 ^q 11:4 Sek 4:3,11-14 ^r 11:5 2 Sml 22:9; Sng 97:3 ^s 11:6 Kis 7:17-20; 1 Sml 4:8; 1 Kin 17:1 ^t 11:7 Dan 7:21; MHO 17:8
^u 11:8 Luk 13:34 ^v 11:11 Ese 37:5,10

Hoho awia hom nakrok ira nonaw, hohkwe sawk waw non nak-ie, nonkumey mon.^w

¹³Enekwei sohiy nonaw kokwe, kina kwarezi piap-araw hiy pa kinuw-way wei-a-wei. Taun sohiy so kopi iha seys mo kopi kamon hokwe nuw-mon piapay lowpway. Seyr uwrса mokwe 7000, sankaw way wei-a-wei okin kuor-ma-kuor say. Har su ma lwayr somokwe sawk, seme nuw-hok krwepakrwe. Homkwe sawk God nonkumey ko se seirpey-ok seme me-ihey.^x

¹⁴Low krompri mo kreysyar kokwe papo kiy-ousne. Sawk low krompri mo pariawey-ar kokwe peypey kiy-ousne ey korey.^y

Hu iha sirom mu nareysyar non mo pariawey-ar se ma lou hiy non

¹⁵Ensel pariawey-ar hiy hyo hu pariawey-ar se lou menkin, nonkumey hokwe sawk wouk-ok aiopey hay hom senkin lokre me,

“Krai, ki se hiy-wayr ey hokwe hromo Hakamay o, Krai huonok-prosue-uwр o, hoho iha mon kiy-wak. Hiykwe senkinaw-aw hi-anok-anok wayr peyow peyow ey.”^z

¹⁶Sios makwey-uwр sune seys iha seys ihaiha-aw God so inour mon hmo sia-king mon ma liwak sir homkwe ine-maku ki mon kuayk-sakuayk hawon sowkway nok, God se me-ihey, ¹⁷senkin,

“Hromo God Hakamay, Krai Lowpwarowp non, hunkwe pokon ko, seyr paraw ko! Hromkwe hne kar me ey, payhokuaw, hunkwe hno krai hokwe papo lonok, seyr hunkwe pa kiyhiy-wayr pie.

¹⁸Uwrса hne ma nan kiykiy-ay lopa homkwe, hne kokwe swaw owh-ya loun, payhokuaw, hno aw-mar lie enekwei hokwe po kiy-ousne. Seyr enekwei, hwon lokrue ha me mesor anon anon ey hokwe po kiy-ousne. Seyr enekwei hno mey-uwр profet lowpwarowp o, hno uwrса arian hne ma me-ihey o, paswaw non, aiopey non, seme maym ma-sahre kow ey hokwe po kiy-ousne. Seyr enekwei hokwe po le, uwrса ki se ma mon piapay me mon piapay ey hokwe.”^a

¹⁹Sa God so a pekney-weys nonkumey ko se kampi menkin, a pekney-weys serey mon kokwe hakwe sawk bokis hyo sokior-ok non ke lira. Seyr enekwei sohiy nonaw kokwe eiwa hom lok-sanweyr-anweyr nok, nompow aiopey hay hom lwoun kawk owk-mniy-ma-mniy merie merie. Seyr kina hiy le nok, hu-weyp mein me hieyn hom sueyr se hieyn kiynuw-ows.^b

Sa prueyn o, kyei kwarezi hay o

12 ¹Sa meir suwon kamon hiy makiy-ousne, nonkumey mon. Meir sokukwe irweyk-aw-araw. Sa prueyn hokwe hoko owh ko omeme

^w 11:12 2 Kin 2:11 ^x 11:13 MHO 6:12; 16:18 ^y 11:14 MHO 9:12 ^z 11:15 Sng 10:16; Dan 2:44 ^a 11:18 Sng 110:5; Ro 2:5; MHO 20:11-13 ^b 11:19 Hi 9:4; MHO 8:5; 15:5; 16:21

mokwe ey se lie, seyr yeyn hokwe hoko sune ouon mon lwak. Makwey-kokway napuar iha seys mu nareysyar non ma meio kokwe hoko makwey mon lwak. ²Sa sokukwe ney swaw non. Ney hiykwe pa hrekawk. Hokwe pa eheyr nak-yuk, ya non ma nak-oum sokwe. ³Sei, meir kamon hok ma-lousne, nonkumey mon. Meir sohokwe kyei kwaresi oupuey, makwey iha sirom mu nareysyar non, seyr kon iha seys non hiy lousne. Seyr hyo makwey iha sirom mu nareysyar non somokwe makwey-kokway iha sirom mu nareysyar non. ^c ⁴Hyo orow hiykwe napuar non ko kopi krompri mo kopi kamon se kanuw-okin krór-say kuayk sakuayk ha, ki mon. Hiykwe sawk sa, ney ma liwak e ma mon sohok ko inour mon liarok, ney se kros-a e, hok liwak ohya sow non. ^d ⁵Sa sokukwe ney norwayo se liwak. Ney sohokwe uwr sa me ain-ho non hiy-wayr kraiy ey hiy non. Sawk ney sohokwe aheyr aheyr nonaw saw-ok-sahya way nok nok, sa God o, hyo sia-king o, serey way nakey kow. ^e ⁶Sawk sa sokukwe ki hrahra-aw mon hakan nok, yier God hiykiaw hoke ma meio koruay kow mon. Heke kokwe, eypok mokwe 1260, sankaw hiy-wayr ihey ey, yier serey kokwe.

⁷Wo, nonkumey mon kokwe sawk, aw aiopey hay lokyah ono. Maikel o, hyo ensel o, homkwe kyei kwaresi hay se lono. Kyei kwaresi o, hyo ensel o, seyr Maikel se ma-sahre ono. ^f ⁸Sawk kyei kwaresi so krai hokwe liy-ar non-wak pa. Sa hme kokwe nonkumey mon kokwe isay lwayr pa seme lwak. ⁹Wo, kyei seirpey sohokwe sa ki mon sehe lway swasow ha. Hiykwe sok pey pey-iwoh. Hyo uru hokwe pou, seyr Satan-ok ma me hiy non. Hiykwe uwr uwr sa me ma mon anyan swakreik ha hiy non. Hye kwe ki mon lway swasow ha, hyo ensel me nion. ^g

¹⁰Sa hakwe wouk-ok aiopey hay, nonkumey ko hok senkin me ke lonuayk,

“Enekwei ohokwe hromo God so huonok-prosue-yor o, hyo krai o, hiy king lwak ey o, po kiy-mon ousne. Seyr Krai so krai hiy-wayr ey seyn, po meio ousne. Payhokuaw, uwr, hromo wayh-om me eypok arawh, eypok arawh God so inour mon ma liarok me-mawmaw kow se kokwe papo lway swasow ha, nonkumey ko hokwe. ^h

¹¹Hromo wayh-om homkwe pou se kokwe, Sipsip-ney so nioh non o, seyr God so ok hom ma mesor kumay o, sohiy non lono su akre akre. Mo, hme lokin kuor okru e mon hi, homkwe hmo owh me nak-sosor pa.

¹²Nonkumey-om, uwr sa serey ma lwayr hom seyn, homkwe kar seme ley e. Sawk ki o, sour-yawp-ar o, piap ya lwak a, payhokuaw, pou

^c 12:3 Dan 7:7 ^d 12:4 Dan 8:10 ^e 12:5 Sng 2:9; Ais 7:14; 66:7; MHO 19:15 ^f 12:7 Ju 9
^g 12:9 Stt 3:1,14; MHO 20:2 ^h 12:10 Jop 1:11; Sek 3:1

hiyke hmo owh mon po laye. Hyo swaw hokwe ya eyn-aw krikri, payhokuaw, hiyke nonkway, hyo enekwei hokwe pa haraw lwak.”ⁱ

¹³Kyei kwaresi sohiy senkin lira menkin, hyekwe ki mon po lway swasow ha, hiyke sawk sa, ney norwayo se ma liwak sokwe nwaaku. ¹⁴Sa sokukwe sawk wayp aiopey hay so somekyow kreysyar ke lway kow, hok hoko yier arian, ki hrahra-aw mon ka sian nok e hokuaw. Yier serey mon kokwe hokekwe, enekwei mokwe yia krompri, yeyn iha sirom pruw non, sankaw hiy-wayr sue ey, kyei so aw-mar se kokwe.^j ¹⁵Sa kyei hiyke hu se hyo woki ko se swanon-yay ha, yawp se hieyn, sa sohok ko meyki mon, hoke lway nakey e, hu hiy. ¹⁶Sawk hokekwe ki hiy hiy-mon. Ki hiyke hyo woki ke laworyay nok, hu, kyei kwaresi so woki mon ma le sehe lowswa krikri-ay. ¹⁷Kyei kwaresi sohokwe sawk aw-mar sehe lie, sa sokwe. Hiyke sawk sa sohok ko ney-nona har, God so sow mo meyki ma ley o, seyr okar-ok Jisas hiy ma mesor kumay me ma nakruok kraiyay o, hme lono e ley.^k ¹⁸Kyei kwaresi sohokwe sour-yawp-ar so wosion mon harok.

Ay piap-araw aiopey hay sour-yawp-ar ko se ma lousne hiy non

13 ¹Hakwe sawk ay piap-araw sour-yawp-ar ko se ar-ousne ha se lira. Hiyke kon mokwe iha seys non, seyr makwey mokwe iha sirom mu nareysyar non. Kon kamon kamon-aw mokwe makwey-kokway non, seyr makwey kamon kamon-aw mokwe uru God se me piap-ma-piap ey non.^l ²Ay piap-araw sohokwe pusi kaman lepat-ok ma me se hieyn lira, hyo sune mokwe bea so sune me hieyn, seyr hyo woki kokwe laion mo woki ke hieyn. Kyei kwaresi hiyke ay piap-araw se kokwe hyo krai o, hyo sia-king o, hyo krai hiy-wayr ey o, seme kow.^m ³Ay piap-araw aiopey hay sohiy so makwey kamon hokwe os-yop non. Hyo os-yop woki ke hieyn ma laworyay lok sokukwe, uwrssa homkwe senkin lira, hye liy mon okruue. Sawk os-yop sokukwe papo hro-way. Uwrssa lowpwarowp homkwe sawk hye lira preiryay ira way, sawk hyo meyki seme ley neyney.ⁿ ⁴Uwrssa homkwe sawk kyei kwaresi sehe kampueys me-ihey, payhokuaw, hiyke hyo krai hiy-wayr ey hokwe ay piap-araw se kow. Homkwe seyr ay piap-araw se nak-me-ihey, senkin, “Uwr prueyn ay piap-araw ehe hieyn posokwaw lwak o? Uwr hye aw non-ono meir-yay ey hokwe poho?”

⁵Ay piap-araw aiopey hay se kokwe ipan lon, hiy hyo uru arian se nakie e, seyr God se leiwan-eiwan e. Seyr hyekwe yeyn 42 sankaw isay meio mesair, hyo krai hokwe.^o ⁶Hiyke hyo woki ke laworyay nok, God se

ⁱ 12:12 Ais 44:22; 49:13 ^j 12:14 Dan 7:25; 12:7 ^k 12:17 MHO 11:7 ^l 13:1 MHO 17:7-12

^m 13:2 Dan 7:4-6 ⁿ 13:3 MHO 17:8 ^o 13:5 Dan 7:8,25; 11:36; MHO 11:2

leiwān-eiwān, seyr hyo uru o, hyo lwayr yier o, lowpwarowp nonkumey mon ma lwayr sohom o, hme nak-me-kawrpakawr. ⁷Hye kokwe ipan lon, kristen-uwrśa me lono e, seyr hme nak-swakakar e. Seyr hye kokwe kraī, uwr-kayn senkin senkin, owh-ohi senkin senkin, wouk-ok senkin senkin, seyr kipay senkin senkin, sohom mo eir mon lwak ey se kow.^p ⁸Uwrśa lowpwarowp ki ko homkwe hye kampueys me-ihēy ey. Sawk uwrśa hmo uru sa-u, ki ehe ma monhre lopa non uwrśa, su ma lwayr mo mamey mon ma mey iawon sowkway, homkwaw lwak ey. Mamey sokukwe Sipsip-ney ma lokin kuor okruē so mamey.^q

⁹Uwr nweyk non lwak ankin, kwa lonuayk.

¹⁰Sa kalabus-a mon uwr pose lway swakawk e mon e, uwr sohokwe mo kalabus-a mon ka lway swakawk. Seyr uwr pose lokiane okruē e mon e, hyekwe mo seik non ka lokiane okruē.

Sa enekwei senkin hiy lousne ankin, kristen-uwrśa homkwe, hmo nan kiykiy-ay yor kokwe kwa nakruok kraipakrai, seyr nak-orok kraiai.^r

Ay piap-araw ki ouon ko se ma ar-ousne ha hiy non

¹¹Ha sa ay piap-araw kamōn ki ouon ko se ma kiy-ousne se makiy-ira. Hiykwe kon kreysyar non. Hyo kon kreysyar kokwe sipsip so kon ke hieyn, seyr hiykwe kyei kwaresi so ok eyn me. ¹²Ay piap-araw meyki ko hiykwe ay piap-araw peyr ko sohiy so kraī, kipay me hiy-wayr ey non po hiy-meio me-sair kow, ay piap-araw peyr ko so inour mon. Sa hiykwe uwrśa me me-sasay, ay piap-araw peyr ko, os-peik non ma nakian sasowriy sow sehe kampueys me-ihēy e. ¹³Ay piap-araw meyki ko hiykwe meir suwon ipēy-ar kraī non me mesair kow. Hiykwe ya nonkumey ko ke mon ousne nok, ki mon ay-nuwnak-aye, lowpwarowp mo nene nonaw.^s ¹⁴Ay piap-araw peyr ko so inour mon kokwe, ay piap-araw meyki ko hiykwe uwrśa ki mon ma lwayr me kokwe meir kraī non hiy ma meio ousne non lokin lor-a-lor kow. Sa hiykwe uwrśa me kokwe ay piap-araw os-peik non so owhnan se meio yay e mekow. Ay piap-araw sohokwe, paraw aw-seik hok hye ma lokian pru-sow, seyr hiy su ma ma-lwayr hiy non. ¹⁵Sa ay piap-araw se kokwe ipan lon kow, ay piap-araw os non so owhnan se losiahakar kow e, hiy ok me e, seyr uwrśa hye me-ihēy e ma me-puar me ka mon okruē. ¹⁶Ay piap-araw sohokwe uwrśa lowpwarowp me kokwe meir piap-araw se po me-sasay lokin-mawn kreik. Har mokwe iha sayar mon, seyr har mokwe ine-maku mon. Mo hom hakamay hi, seyr uwr uru lopa hi, mo hom omeme kraiar non hi, seyr omeme lopa hi, mo hom uwr, liaup-uwr lopa hi, seyr hom mey-uwr puraw hi. ¹⁷Uwr prueyn meir piap-araw sohiy lopa lwak ankin, hiykwe omeme mein-owon non liy

^p 13:7 MHO 11:7 ^q 13:8 Sng 69:28; MHO 20:12; 21:27 ^r 13:10 Jer 15:2; 43:11; MHO 14:12 ^s 13:13 1 Kin 18:24-39; Mat 24:24; MHO 19:20

nakway ley, seyr hyo omeme mokwe uwrsa har homkwe mein-owon non liy nakway ley. Meir piap-araw sohokwe ay piap-araw sohiy so uru, seyr hyo uru so urowp se me memeir.^t

¹⁸Ok sohok ko meyk kokwe, mawkhaw ihey-ar nonaw liy nonkway. Uwr nonkway yaprue non hiykwe ay piap-araw sohiy so urowp se kwa meio mon sorasor nonkway, payhokuaw, urowp sohokwe uwr prueyn so uru. Urowp sohokwe, 666.

Sipsip-ney hiy 144,000 unsaney me nion ma non-wak hiy non

14 ¹Hai, ha makiy-ira, Sipsip-ney hiy mnuw Saion mon lorok se. Hye nion kokwe uwrsa 144,000 hom non-nakrok-kay. Uwrsa somokwe hyo uru o, hyo Aio so uru o, hmo ine mon nak-mey iarok. ²Seyr hakwe nonkumey mon kokwe wouk-ok kamon mein-saw-hu hiy ma kyor-swanon keyn, seyr nompow aiopey hay hiy ma me se hieyn se lonuayk. Wouk-ok sokukwe uwr gita lokin-uwr hom hmo gita me ma lokin me hieyn lwoun.^u ³Uwrsa 144,000 somokwe God so sia-king o, ay iha-aha-aw su ma lwayr o, seyr sios mo makwey-uwr o, hmo inour mon nakrok-kay. Homkwe yayh kokwe iwon ke lowk. Yayh sokukwe uwrsa har ki ko homkwe liy mon sorasor nonkway ley, sa uwrsa 144,000 homkwaw. Uwrsa somokwe God hiy ki ko me ma nakway huonokyaw prosue hom non.^v ⁴Uwr somokwe sa me nion non-iawon sowkway pa, hom orki non seme lwak ley, korey law. Homkwe luw-luw-aw ihey-ar lanio sayok.^w Sipsip-ney hiy yier perey ley e, uwrsa somokwe mo hyo meyki-aw lonsu pyay. God hiykwe uwrsa seme kokwe ki ohiy so uwrsa mo ompok ko me po nakway huonokyaw prosue. Uwrsa somokwe ayay peyr-mawk ma leip hom non. Homkwe ayay, God o, Sipsip-ney o, hehe ma naws kow pie me hieyn. ⁵Hmo woki mon kokwe okrei-ok lirway pa, seyr homkwe hey n lopa.

Ensel pruompri-ar hom non

⁶Wo, ha sawk ensel prueyn non-ayaw mon sian se makiy-ira, hiykwe lwayr peyow peyow ok-ihey-ar, uwrsa ki mon ma lwayr me mesor kow ey non. Hiykwe uwrsa owh-ohi senkin senkin non me o, uwrkayn senkin senkin ko me o, unsaney wouk-ok senkin senkin non me o, uwrsa kipay lowpwarowp ko me o, hme mesor kow ey. ⁷Hiykwe wouk-ok aiopey hay non senkin me, “Homkwe God se kwa hok, seyr hye panpaniowni kwa kow, hiy ipey-ar ma lwak sehe. Payhokuaw, enekwei hokwe po kiy-

^t 13:17 MHO 14:9-20; 16:2; 20:4 ^u 14:2 MHO 1:15; 19:6 ^v 14:3 Ais 42:10; MHO 5:9; 7:4 ^w 14:4 Nonkway-uwr homkwe senkin nan, ok sohok ko meykiar kokwe senkin, uwr 144,000 homkwe sios me memeir. Sios homkwe orki lopa lwak e, seyr Jisas se nion-aw non-wak e. Baibel hokwe sa-huon-yor ke me-sous pey.

ousne, uwr̄sa me mesor anon anon ey hokwe. Hye-aw kampueys me-ihey e, hiykwe nonkumey o, ki o, sour-yawp-ar o, yawp-eyh-ney o, seme monhre.”

⁸Ensel peyr-mawk ko so meyki hokwe sawk ensel prueyn hiy makiy-me, senkin, “Hokwe papo makuayk! Taun Babilon Seirpey kokwe papo makuayk! Hokwe uwr̄sa lowpwarowp me hoko wain me isay owswa, hoko wain-hu piap-araw kraï non seme, sa hom uwr̄-yokun, sa-yokun nweyh kane yor ke nak-mon e.”^x

⁹Ensel prueysyar so meyki hokwe sawk ensel prueyn hiy wouk-ok aiopey hay non ma-lokre me, senkin, “Unsaney, ay piap-araw o, hyo owhnan o, seme ma kampueys me-ihey homkwe, ay piap-araw so meir piap-araw se, hmo ine-maku mon o, seyr hmo iha sayar mon o, serey ma nak-mey iarok homkwe,^y ¹⁰God so wain se lowswa ey. Wain sohokwe God so aw-mar kraï ipey-ar non hiy non. Hiykwe woki po nonkaww wouk-wouk-ay nak-iarok, hyo yiawk kasaw lon hohuaw non sohokwe. Unsaney yor piap senkin ma lon somokwe, ensel pekney-weys mo inour mon o, Sipsip-ney so inour mon o, homkwe aw lok ey, mein-salfa ya non mon.^z ¹¹Ya, uwr̄sa me aw ma mon ok sohok ko yakuw kokwe, senkinaw leyh peyow peyow wayr ey. Unsaney, ay piap-araw o, hyo owhnan o, seme ma me-ihey, seyr hyo uru so meir piap-araw se ma lonok somokwe, eypok arawh, eypok arawh, aw senkinaw lok wayr-wayr ey.”^a ¹²Uwr̄sa, God so sow mo meyki ma ley, seyr Jisas se-aw ma nakruok nan kiykiy-ay homkwe, enekwei piap hom lousne ankin, kristen-uwr̄sa somokwe aymarowh eyn kwa nakrok kraïay wayr.^b

¹³Ha sa wouk-ok kamon nonkumey ko hok senkin me ke lonuayk, “Kwa kiy-mey, senkin: Pokon ohiy kiy-nuw-hohyay pie. Unsaney, Hakamay se hokuaw ma lokrue homkwe, God so uron ihey-ar so ouon mon lwak.”

Niohney hiy kiy-onuayk-me, “Okar-ar, homkwe mey, hom kruayk ma meio eme hokuaw mokwe, kar nonaw liy nak-iwak nieys ihey, payhokuaw, mey hom ma meio lowpway somokwe, hme nion noney wayh-wayh.”

Enekwei lay-lay ki ko me lompan ompan ey hokwe po kiy-ousne

¹⁴Ha sa makiy-ira, waw-weys ke. Seyr waw-eir mon kokwe uwr̄ prueyn “iwar mo ney se hieyn” ma lira, hiy liwak. Makwey-kokway gol non ma meio kokwe hyo makwey mon lwak, seyr seik arupey, lay-lay loki-mane ompan ompan ey kokwe, hyo iha mon nakruok.^c ¹⁵Sa ensel prueyn God so a pekney-weys ko se ar-ousne ha nok, wouk-ok aiopey hay non ka-lokre me, uwr̄ waw mon ma liwak sehe, “Hunkwe hno seik

^x 14:8 Ais 21:9; Jer 51:7,8; MHO 17:2 ^y 14:9 MHO 13:12-17 ^z 14:10 Ais 51:17,22; Jer 25:15-16 ^a 14:11 Ais 34:10 ^b 14:12 MHO 13:10 ^c 14:14 Dan 7:13

ke lonok nok, lay-lay seme lompan ompan. Payhokuaw, enekwei ayay me lompan ompan ey hokwe papo lousne, seyr laylay ki ko mokwe papo lou lowpway.”¹⁶ Sawk uwr seik non, waw mon ma liwak sohokwe, hyo seik ke kiynu-woskin-a-kin, ki so eir mon. Sa lay-lay ki ko somokwe seme nuw-ompan ompan lowpway.

¹⁷Sei, ha ensel prueyn God so a pekney-weys nonkumey ko se ma ar-ousne ha se makiy-ira, hiykwe seyr seik aru-pey non. ¹⁸Hai, ensel prueyn ya ke hiy-wayr-uwr hiykwe sawk alta ko se ar-ousne ha nok, ensel seik ke ma nakruok sehe ka-lokre me, wouk-ok aiopey hay non. “Hunkwe wain-i kokwon non wain-wueir ki mon ma lwak seme kwa loki-mane hriaw, payhokuaw, homkwe papo lou.”^d ¹⁹Sa ensel sohokwe hyo seik ke kiynu-woskin-a-kin nok, wain-ou seme kiynu-okimane hriaw nok nok, ki-saw aiopey hay, wain-ou me lour ompos kreik ey mon nakey. Ki-saw sohokwe God so aw-mar hiy non.

²⁰Wain-ou somokwe sawk ki-saw serey lour sanpasan piyses kreik, taun so meykyay mon. Seyr nioh hokwe ki-saw ko se ar-ousne ha. Nioh sohokwe sawk hu ma lohuwn kie se hieyn lwak. Nioh so kilomita meiami hokwe sankaw lwak, 300, seyr hyo iway so mita hokwe, sankaw lwak 1.5.^{e f}

**Ensel iha sirom mu nareysyar, low iha sirom mu
nareysyar me ma nakruok hom non**

15 ¹Hai, ha ma-sahre ira, meir suwon irweyk ipey-ar nonkumey mon lousne. Hakwe ensel iha sirom mu nareysyar non me lira, homkwe low iha sirom mu nareysyar non me nakruok. Low somokwe piap-araw-arar, uwr sa me mon piapay ey hom non. Low somokwe pariawey-ar hom non, payhokuaw, somokwe God so aw-mar me meio sompay sompay lowpway ey hom non. ²Sa hakwe sour-yawp-ar, glas non ma monhre, seyr ya non ma nak-sawahre se hieyn se lira. Hakwe seyr unsaney har hom ay piap-araw o, hyo owhnan o, seyr hyo uru so urowp o, seme ma lono swakakar me nak-ira. Homkwe sour-yawp-ar, glas non ma monhre serey nakrok. Homkwe gita, God hiy hme ma kow me nakruok. ³Seyr homkwe yayh Moses, God so mey-uwr o, Sipsip-ney o, hoh ma lowk ke lowk, senkin,

“God Hakamay, Krai Lowpwarowp non ara, hno mey mokwe irweyk-aw-ar, seyr krai ipey-ar non. King, kipay lowpwarowp me ma

^d 14:18 Jol 3:13 ^e 14:20 Nonkway-uwr kraiar homkwe senkin nan, taun aiopey hay sohokwe mo Jerusalem se me. Grik mo ok non kokwe senkin mey, nioh sohom mo meir mokwe 1600 stadia. Hromkwe ok sokukwe senkin po kankoum, 300 kilomita. Hromkwe nonkway lwak popriy pey, Jon hiykwe meir sankaw senkin somokwe pay me po me memeir pak e. ^f 14:20 Ais 63:3; MHO 19:15

hiy-wayr ara, yor lowpwarowp, hwon ma meio mokwe luw-luw-aw-ar, seyr ok-ar-ar.^g

⁴ Hakamay, uwrsa hne hok lopa mokwe, pomo? Hai, uwrsa hno uru se seirpey-ar lowk nakie lopa mokwe, perey lwak o? Payhokuaw, pekney-weys-ar hokwe hunkwaw sora. Uwrsa kipay lowpwarowp ko homkwe ya le a, hno inour mon kokwe hno uru se-aw nakie e, payhokuaw, hno yor luw-luw-aw mokwe po me-sair hrahra kow.”^h

⁵ Sohiy so meyki hokwe ha sawk God so a pekney-weys nonkumey ko hiy kampi se lira. A sohokwe, God so sel-a, God se nian ma me-hror say kumay hiy non.ⁱ ⁶ Seyr ensel iha sirom mu nareysyar, low iha sirom mu nareysyar non me ma nakruok homkwe God so a pekney-weys ko me lousne-sa-ousne ha. Homkwe laplap mnow-mnow-aw ihey-ar, ey se hieyn ma lyar me lie nakrok-kay. Homkwe seyr sumow-mays gol non ma meio mokwe, hmo uron-kowp mon nak-ok-sama-peykyay. ⁷ Sa ay, su ma lwayr ihaiha-aw mo prueyn hiykwe sawk ensel iha sirom mu nareysyar mokwe yowr gol non iha sirom mu nareysyar non ma meio me kow. Yowr somokwe lwayr peyow peyow God so aw-mar hokwe woki nuw-wak. ⁸ A pekney-weys sohokwe sawk God so panpaniowni o, kraï o, hoho yakuw homkwaw nuw-wak. Unsaney prueyn liy iyawriy ley, a pekney-weys serey kokwe, sa omok low iha sirom mu nareysyar, ensel iha sirom mu nareysyar hom ma nake sohom ley lowpway sehe.^j

Yowr iha sirom mu nareysyar God so aw-mar non hom non

16 ¹ Ha sawk wouk-ok aiopey hay kamon God so a pekney-weys ko hok ensel iha sirom mu nareysyar me senkin me ke lonuayk, “Homkwe ley nok, yowr iha sirom mu nareysyar God so aw-mar non seme ki mon kyor-swanon-sow ha.” ² Sa ensel peyr ko hiy kanak-ey nok, hyo yowr God so aw-mar non sokwe ki mon ka-swanon-sow ha. Hiy senkin lon menkin, kuor piap-araw homkwe sawk uwrsa, ay piap-araw sohiy so meir piap-araw se ma nak-wayr o, hyo owhnan se ma me-ihey o, hmo owh mon nuw-kreyryay. Kuor somokwe hmo owh me, aw kraiar nuw-mon nak-oum.^k

³ Hai, ensel sohiy so meyki hokwe, ensel prueyn hiy hyo yowr God so aw-mar non ke sour-yawp-ar mon makiy-swanon keyn. Sawk sour-yawp-ar hokwe lokrue-uwr mo nioh se hieyn loksa-hriysow hnuawon keyn, sa ayay sour-yawp-ar ko somokwe seme nuw-away keyn lowpway.

⁴ Hai, ensel prueysyar so meyki hokwe sawk ensel prueyn hiy hyo yowr God so aw-mar non ke yawp lowpwarowp mon kiy-swanon-sow nok, seyr yawp-eyh-ney mon makiy-swanon keyn. Hu somokwe sawk nioh me

^g 15:3 Kis 15:1; Sng 139:14; 145:17 ^h 15:4 Jer 10:6-7; Sng 86:9 ⁱ 15:5 Kis 38:21 ^j 15:8 1 Kin 8:10-11; 2 Sto 5:13-14; Ais 6:4 ^k 16:2 Kis 9:10; MHO 13:12-17

hieyn loksa-hrisow hnuawon keyn.¹ ⁵Hakwe sawk ensel hu lowpwarowp me ma hiy-wayr hiy senkin me se lonuayk,

“Hunkwe pekney-weys-ar, hunkwe pokon ko, seyr hunkwe paraw ko. Hno yor uwrса me mesor anon anon ey hokwe, luwluw-aw-ar.

⁶ Payhokuaw, uwr piap-araw homkwe hno uwrса arian o, hno mey-uwr profet me o, nioh me po lokin kwormakwor non-say. Sa hunkwe uwr piap-araw somokwe hmo nioh me seme kow owswa. Hmo heyn arian me hokuaw kokwe homkwe low piap-araw somokwe seme ma-sahre onokyaw.”

⁷Hakwe seyr wouk-ok kamон alta ko hok senkin me ke lonuayk,

“Hunkwe God Hakamay Krai Lowpwarowp non, hno yor, uwrса me ma mesor anon anon kokwe okar-ar, seyr luw-luw-aw.”^m

⁸Hai, ensel pruumpri-ar mo meyki hokwe sawk ensel prueyn hiy hyo yowr God so aw-mar non ke ey mon maka-swanon-yay. Sa ey-li me ipan sehe lon kow, uwrса me loum kwor say e. ⁹Seseyn, ey-li hiykwe sawk uwrса me seme loum kwor say. Uwrса somokwe sawk God se sehe me-piappapiap yay, hiy low piap-araw seme ma mon ousne sohom. Sawk homkwe hmo weynpaweyn piap-araw me uron kama-koum lopa, seyr hom God se seirpey-ok me ey hokwe homkwe me-puar.ⁿ

¹⁰Hai, ensel iha-iha-aw mo meyki hokwe, sawk ensel prueyn hiy hyo yowr God so aw-mar non ke ay piap-araw so sia-king mon maka-swanon-yay. Hiy senkin lon menkin, sa uwrса, ay piap-araw so krai ouon mon ma lwak mokwe eym-nawp hiykwaw nuw-swakuwmay. Sawk uwrса homkwe hmo sane arian me peyk mapru, opion ya non ma nak-oum seme.^o ¹¹Seyr homkwe God nonkumey ko se nak-me-piappapiap, kuor hmo owh mon ma mon ousne sohom, seyr hmo opion opion me aw ma mon-ok me hokuaw. Sawk hmo uron mokwe kankoum pa, hmo yor piap-araw me lokriy ha ey mokwe.

¹²Hai, ensel iha sirom mo meyki hokwe sawk ensel prueyn hiy hyo yowr God so aw-mar non ke yawp aiopey hay Yufretis mon makiy-swanon keyn. Yawp sohokwe sawk sehe lia krekre yay, king ey kaie ko hmo yerki se mon ia kow koruay, hom yawp Yufretis se kuan iau ey se.^p ¹³Ha sa niohney pruumpri-ar orki non peirsiow me hieyn me lira. Homkwe kyei kwareси o, ay piap-araw o, seyr okrei-profet o, hmo woki mon lousne sa-ousne. ¹⁴Homkwe poup piap-araw mo niohney, meir suwon me ma meio ousne hom non. Niohney pruumpri-ar somokwe king lowpwarowp ki ko mo owh mon ma ley neyney hom non, hme huonokyaw swa-hokruw e, God Krai Lowpwarowp non so enekwei ipey-ar se aw lono e.^q

¹ 16:4 Kis 7:17-21 ^m 16:7 Sng 19:9; MHO 15:3 ⁿ 16:9 MHO 9:20-21 ^o 16:10 Kis 10:22; Ais 8:21-22 ^p 16:12 Ais 11:15 ^q 16:14 MHO 19:19

¹⁵“Kwa lonuayk, hakwe yokun-uwr se hieyn le. Sa uwr, inaw ma liwak, seyr hyo klos me ma nak-wayr sosor hiykwe God so uron ihey-ar so ouon mon lwak, payhokuaw, hiykwe uwrso mo nene mon kokwe, sike apaw liy lanio ley, seyr owh-mar liy lon ley.”^r

¹⁶Wo, niohney piap-araw homkwe sa king me hiy-e, kipay, Hibru hom Armagedon-ok ma me mon.^s

¹⁷Hai, ensel pariawey-ar hiy hyo yowr God so aw-mar non ke waw mon makiy-swanon-yay. Sa wouk-ok aiopey hay sia-king ko, God so a pekney-weys mon ma lwak ko hokwe senkin ar-me-ha, “Mey lowpwarowp mokwe po kiy-meio lowpway.” ¹⁸Sa kiy-peypey pa, eiwa hok kiynuw-ok-sanweyr-anweyr nok, nompow aiopey hay hom lwoun kaww owk-mniy-ma-mniy merie merie, seyr kina piap-araw kwaresi hiy kiynuw-way wei-a-wei. Kina senkin sohokwe paraw uwrso me monhre pie non lousne pa. Kina sohokwe irweyk-araw, kina lowpwarowp mo eir mon lwak.^t ¹⁹Taun seirpey sohokwe sawk kopi krompri non onkama-seyr, seyr ki sohiy so taun lowpwarowp mokwe po mon piapay lowpway. God hiykwe taun seirpey Babilon ko yor piap-araw me ma-nanpanan, seyr wain, hyo yiawk ko se ma-isay owswa. Wain sohokwe hyo aw-mar ipey-ar hiy non.^u ²⁰Oion-waw lowpwarowp hom kiynuw-hakan sakan nok lowpway. Seyr mnuw hom kiynuw-mamanyay.^v ²¹Seyr sueyr-weyp aiopey hay mein me hieyn hom ma-kanuw-prorkuw. Sueyr-weyp sohom mo kilo mo meir mokwe, 50. Homkwe nonkumey ko me laye, sawk uwrso mo owh-eir mon makuayk sakuayk nuw-mon piapay. Wo, uwrso homkwe sawk God se sehe me-piapmapiap yay, payhokuaw, low sohokwe piap-araw-arar.^w

Yokun nweyh-kane yor ko pouh-ar hok non

17 ¹Sa ensel iha sirom mu nareysyar mo prueyn, yowr iha sirom mu nareysyar me ma nakruok hiy le nok, hane kiy-me, “Hunkwe kwa le, hakwe hne kokwe yokun-nweyh-kane-yor ko pouh-ar, yawp poya-poya mon ma lwayr ko low penkin me lonok e seme hne mesair kow ley.^x

²King poya-poya kipay lowpwarowp ko homkwe hoke nion yokun po nweyh kane. Sawk sa sohok ko yokun-nweyh-kane-yor kokwe uwrso me kokwe wain-hu ma lowswa me hieyn po nuw-mon lawk-lawk yay wayr.^y

³Wo, hane kokwe sa Niohney Pekney-weys hiy leyneyr-kaww prusow menkin, sa ensel hiy ki hrahra-aw mon makiy-way nakey. Ha serey lwak menkin, hakwe sawk sa prueyn ke lira, hokwe ay piap-araw oupuey so eir mon liwak. Ay piap-araw so owh hokwe uru poya-poya God se me-

^r 16:15 Mat 24:43-44; MHO 3:3 ^s 16:16 Sek 12:11 ^t 16:18 MHO 4:5; 8:5 ^u 16:19 MHO 14:10 ^v 16:20 MHO 6:14 ^w 16:21 Kis 9:23-24; MHO 11:19 ^x 17:1 Jer 51:12-13
^y 17:2 Ais 23:17; Jer 51:7; MHO 14:8

piapmapiap ey me-aw nuw-mey lowm-a-lowm. Seyr hiykwe makwey iha sirom mu nareysyar non, seyr hyo makwey mon kokwe kon iha seys hom nak-inakrok-kay.^z ⁴Sa sohok ko omeme owh ko mokwe owh-mein oupuey kreys irweyk eyn ma nak-monhre me lie. Seyr hoko omeme owh ko mokwe, gol o, mein yaprue ihey-ar o, momor ihey-ar o, sohiy non nak-howhway. Hokwe yiawk gol non ma monhre se nakruok. Yiawk sohokwe yor piap-araw irweyk-araw o, hoko yokun-nweyh-kane-yor sohom o, hom nuw-yawriy wouk-wouk-ay.^a ⁵Hoko ine-ku hokwe uru kamon, meyk ouon-aw ma nak-hiyhiy hokwe senkin nak-mey iarok:

Hakwe Babilon seirpey-ar, yokun-nweyh-kane-uwrusa lowpwarowp o, seyr yor piap-araw-ar, kipay lowpwarowp mon ma lwak liyay o, sohom mo pouh-ar.

⁶Hakwe seyr senkin lira, hokwe kristen-uwrusa mo nioh me po lowswa lawk-lawk-yay. Uwrusa somokwe Jisas se ma nan kiykiy-ay me ma lokin kwor-ma-kwor okruie hom non.

Hakwe hoke lira menkin, hakwe sawk nuw-preiryay.^b ⁷Sa Ensel hiy hane senkin kiy-me, “Hai, hunkwe panoke nuw-ira preiryay o? Hakwe hne kokwe sa sohok o, ay piap-araw hoke ma lway nak-anio, makwey iha sirom mu nareysyar non, seyr kon iha seys non, hoho ouon-aw-ok ko meykiyar me hne kiy-mesor kow ley.^c ⁸Ay piap-araw sohokwe paraw kokwe su lwayr, sawk enkin ohokwe hiykwe su ma-lwayr pey. Sawk hiykwe ya lousne a, ki-saw limon lopa ko hokwe. Sa hiykwe yier piap-araw laway pror kaw k ha ey lopa mon nuw-ey ha. Uwrusa ki mon ma lwayr, hmo uru God so mamey lwayr peyow peyow ey mon ma mey pa somokwe, enekwei God hiy ki ehe ma monhre pie pa non hokwe, uwrusa senkin somokwe ay piap-araw sehe lira preiryay ey. Payhokuaw, paraw hiykwe su lwayr, sa enkin ohokwe hiykwe su ma-lwayr pey, sa omok ya ma-lwayr a.^d

⁹Uwr mawk-how ihey-ar, nonkway yaprue non hiykwe weynpaweyn seme liy nonkway popriy. Ay piap-araw sohiy so makwey iha sirom mu nareysyar non somokwe, mnuw iha sirom mu nareysyar non, sa sohok ma liwak seme meir. ¹⁰Seyr makwey iha sirom mu nareysyar non somokwe, king iha sirom mu nareysyar me meir. King iha sirom mokwe papo makuayk sakuayk lowpway, sa prueynyaw hiykwaw lorok, sawk prueyn hiykwe peyr lousne pa. Hiy le ankin, hiykwe enekwei haraw-aw lwayr ey. ¹¹Sa ay piap-araw, paraw su ma lwayr, sa enkin ohokwe hiykwe su ma-lwayr pey. Hiykiaw kokwe king prueyn, iha sirom mu nareysyar pruw non hiy non. Hiykwe king iha sirom mu nareysyar mo prueyn hiy non, sa hiykwe yier laway pror kaw k ha ey mon nuw-ey ey.

^z 17:3 MHO 13:1 ^a 17:4 Jer 51:7; MHO 18:6 ^b 17:6 MHO 18:24; 19:2 ^c 17:7 MHO 13:1

^d 17:8 Dan 12:1; MHO 11:17; 13:7

¹²Kon iha seys, hwon ma lira hokwe, king iha seys me meir. Homkwe peyr kraï, king-mey meio ey ke lonok pa. Sawk homkwe king-mey aua kamon-aw hiy-wayr-kraï ke ya lonok a, ay piap-araw se nion non-meio ey hokwe.^e ¹³King sohom mo uron mokwe liy-liy-aw lwak ey. Homkwe hmo kraï o, hmo hiy-wayr mey o, ay piap-araw sehe-aw kow ey. ¹⁴Ay piap-araw sohiy o, king iha seys sohom o, homkwe Sipsip-ney se kokwe aw lokyah ono ey. Sawk Sipsip-ney o, uwrça hiykiaw ma me-iaup, seyr hye ma nan kiykiy-ay wayr kraïay o, hom lono akre akre ha ey. Payhokuaw, hiyke hakamay lowpwarowp mo Hakamay-ar, seyr hiyke king lowpwarowp mo King-ar.”

¹⁵Seyr ensel hiy hane makiy-mekow, “Yawp lowpwarowp, yokun nweyh-kane-sa hok ma liwak somokwe, hunkwe papo lira. Somokwe uwrça kipay lowpwarowp ko o, uwrça popua hay o, unsaney owh-owhi senkin senkin non o, seyr wouk-ok senkin senkin non o, seme kiy-meir. ¹⁶Seyr kon iha seys o, ay piap-araw o, hwon ma lira somokwe, yokun-nweyh-kane-sa ipey-ar ke awnie awnie-aw lira ey. Homkwe omeme lowpwarowp hok ma nak-wayr seme lopri lowpway ey, seyr hoke kokwe apaw-aw isay wak ey. Homkwe hoko opion me kros-a nok, hoke ya mon nak-nwaws oum-pru kaw lowpway ok.^f ¹⁷Yor senkin somokwe, God hiykiaw king mo uron me mon nanpanan oksian ey, hmo kraï lowpwarowp uwrça me hiy-wayr ey me ay piap-araw so iha mon-aw kow e. Homkwe ay piap-araw so ok me senkin-awaw lonuayk meio nok ey, sawk omok God so ok me nuw-meio sompay sompay sehe. ¹⁸Sa, hwon ma lira kokwe, taun seirpey-ar. Hiyke king lowpwarowp ki ko me hiy-wayr ey hiy non.”

Babilon hokwe papo mon piapay

18 ¹Sohiy so meyki hokwe ha sawk ensel prueyn hiy nonkumey ko se laye se ma-lira. Hiyke kraï aiopey hay hiy-wayr ey non, sa hyo kyai panpaniowni hokwe ki se ma-kanuw-nak-yar nekie nekie.

²Hiyke ok aiopey hay senkin lokre me,

“Hokwe papo makuayk! Taun Babilon Seirpey-ar hokwe papo makuayk! Enekwei ohokwe hokekwe sawk niohney piap-araw o, poup o, hmo yier se hieyn lwak. Seyr ahney piap-araw o, ahney, uwrça hom awnie awnie-aw ma lira o, homkwe yier serey lwayr.^g

³Payhokuaw, uwrça kipay lowpwarowp ko homkwe hoko wain-hu kraï non se po lowswa lawk-lawk yay. Wain-hu kraï non sohokwe hoko nweyh-kane-yor hok non. King lowpwarowp ki ko homkwe hoke nion yokun po nweyh kane, seyr bisnis-uwr ki ko lowpwarowp homkwe meinowon kraïar po lonokyaw wayr-wayr, hoko lira-way-yor piap-araw non.”

^e 17:12 Dan 7:7,24 ^f 17:16 MHO 18:8 ^g 18:2 Ais 34:11-14; Jer 50:39

⁴Hakwe sawk wouk-ok kamon nonkumey ko hok senkin me se makiy-onuayk,

“Hano uwrsa-om, homkwe hoke kiy-okriy hain nok, kumay mon ar-ousne ha! Homkwe hoko yor piap-araw me peie lon-ondiay ondiay meio o. Low, hoke ma mon piapay ey somokwe, sawk hme nakmon sapeykyay lak!”^h

⁵Payhokuaw, hoko yor piap-araw mokwe papo nuw-mon pipi-yay ie, nonkumey so liy-liy-aw-ar nuw-wak. Seyr God hiykwe hoko yor naway naway mokwe, nanpanan wayr nonaw lwak.ⁱ

⁶Homkwe yor piap-araw hoke kwa ma-sahre mon, hoko yor, hme ma mon me hieyn. Homkwe hoke mawk kreys non kwa sau, yor lowpwarowp piap-araw, hok ma mon somokwe. Homkwe hoko huyiawk mon kokwe wain-hu kraik non hokwe mawk kreys non kwa ma-sahre nonkaww kow, paraw hok hme ma kow owswa so liy.^j

⁷Hunkwe hoke kokwe low, aw kraiar lok ey me kwa nuw-kow, seyr eheyr kraiar kwa nuw-mon lowp-lowp yuk, hok hoko sa-u arian ke ma nak-ie senkin, seyr hoko liwak yor yaprue-ar, hokiaw-ayay ma nak-me-heyr senkin. Payhokuaw, hokwe enekwei enekwei hokiaw-ayay senkin nak-me-heyr, ‘Hakwe kwinn ke hieyn erey liwak! Hakwe sa-win korey. Low mokwe hano owh mon liy lousne ley, seyr hakwe eheyr lyuk lopa!’^k

⁸Saww Babilon hok ma me-heyr sokwe hokuaw kokwe, eypok kamon hokwe hoke kokwe low piap-araw senkin hom saw-mon piapay ey, peik senkin senkin, unuaw liwak yuk yor, siowp lokrue yor. Seyr hoke kokwe ya mon nwaws oum-pru kaww lowpway ey, payhokuaw, God Hakamay, hoko yor me ma lira mesor anon anon hiykwe seirpey-ar.”^l

⁹King ki ko lowpwarowp hoke nion yokun ma nweyh kane, seyr hoko omeme ihey-ar me ma lira way somokwe, taun sohiy so ya-pi ko yakuw hoke ma nwaws oum-pru kaww ke lira ankin, homkwe hoke unuaw nak-iwak sir yuk kworpakwor ok.^m ¹⁰Homkwe meiaw-ar hok nakrok ey, payhokuaw, homkwe hoke nion aw liy non-ok ley. Seyr homkwe senkin me ey,

“Woiow woiow, taun Babilon ey, hunkwe yier seirpey, seyr om kraik ipey-ar non, sa hne kokwe aua kamon-awaw nonaw po mon piapay, hno yor piap-araw me hokuaw kokwe.”

¹¹Sa bisnis-uwr ki lowpwarowp ko homkwe Babilon ke unuaw nak-iwak sir yuk kworpakwor ey, seyr hmo uron mokwe low nuw-hei ey, payhokuaw, hmo omeme mokwe uwr pohom ma-nakway ley.ⁿ ¹²Hmo omeme mokwe

^h 18:4 Ais 48:20; Jer 51:6; 2 Ko 6:17 ⁱ 18:5 Stt 18:20-21; Jer 51:9 ^j 18:6 Sng 137:8; Jer 50:29; 2 Te 1:6 ^k 18:7 Ais 47:7-9 ^l 18:8 MHO 17:16 ^m 18:9 Ese 26:17; 27:30-35 ⁿ 18:11 Ese 27:36

senkin gol, silva, mein ihey-ar, momor ihey-ar, laplap weyspey yaprue, laplap oupuey senkin senkin non, seyr laplap slika, seyr now prawk yaprue non. Seyr omeme senkin senkin, elefan so nays non ma monhre, now ihey-ar meinowon kraiar non ma nakway, bras, ain, puwpuw mey non mey non, sohiy non ma monhre me nak-wayr.^o ¹³Homkwe seyr omeme har mokwe senkin me nak-wayr, sinamon, nayp, ayay non nak-a ey, paura senkin senkin yakuw yaprue ma sway, sanda prawk yaprue non, seyr wain-hu, oliv-won, plaua la ey, wit, bulmakau, sipsip, hos, karis, aw-nweyr-uwrsa, seyr iwar o. Somokwe uwr posokwaw ma-nakway ley.

¹⁴Homkwe hoke senkin me ey, “Omeme lowpwarowp ihey-ar, hwon lonok nak-wayr e ma nan somokwe, papo lira por ha lowpway. Hunkwe ma-lirway lopa, korey law-ar!” ¹⁵Bisnis-uwr omeme kraiar non, yier aiopey hay serey suko me ma meio lonokyaw homkwe hoke meia-w-ar nakrok ira ey. Payhokuaw, homkwe yier aiopey sohiy so aw-nak-ok-yor ke nuw-hok. Homkwe unuaw nak-iwak sir yuk kworpakwor ey.^p ¹⁶Homkwe senkin me ey,

“Woiow, woiow, taun Babilon ey. Paraw kokwe hokwe omeme ow h ko mokwe yaprue me lie. Seyr laplap oupuey irweyk irweyk ey n me nak-ok-sama-peykyay. Seyr hoko ow h mon kokwe, gol, mein ihey-ar, momor ihey-ar, seme nak-howhway.^q

¹⁷Sawk hoko omeme ihey-ar somokwe aua kamon-awaw sokwaw po nuw-mon piapay lowpway!”

Seyr sip me nekie anak anak uwr o, uwrsa sip non ma nakey neyney o, uwr sip me ma hiy-mon nak-anio o, uwrsa har bisnis-mey sip mo meinowon ma meio onokyaw a wayr o, homkwe lowpwarowp meia-w-ar mon nakrok ira ey.^r ¹⁸Seyr homkwe hoke ma loum-pru kaw k ko yakuw ke lira ankin, homkwe senkin kowkow okre me ey, “Yier kamon, taun seirpey sehe hieyn kokwe perey lwak o?”^s ¹⁹Enekwei piap sohokwe homkwe ki-pow me hmo makwey mon louh-say nok, unuaw nak-iwak sir yuk kworpakwor me ok, senkin,

“Woiow, woiow, taun seirpey ey. Yier sohok ko omeme ihey-ar mokwe sip sour-yawp-ar ko mo naykih-nayh hom hoke nion ma non-meio mokwe, meinowon kraiar po lonokyaw lowpway. Woiow, hoke kokwe aua kamon-awaw sokwaw po nuw-mon piapay lowpway.

²⁰Nonkumey ara, taun sehe ma mon piapay hokwe, kar kwa nakey. Kristen-uwrsa o, profet o, homkwe kar kwa ley. Payhokuaw, God hiyke Babilon ke papo mon piapay, yor piap-araw, hme ma mon me hokuaw kokwe.”^t

^o 18:12 Ese 27:12,13,22 ^p 18:15 Ese 27:31,36 ^q 18:16 MHO 17:4 ^r 18:17 Ais 23:14; Ese 27:27-29 ^s 18:18 Ese 27:32 ^t 18:20 Ais 44:23; Lo 32:43; Jer 51:48

²¹Wo, sa ensel kwaresi hay hiy mein aiopey hay, wit-nam me ma mon nokriy-a-nokriy par-say ey se hieyn se lway nok, sour-yawp-ar mon swakeyn omprok ha nok, kiynak-me,

“Sohokwe taun seirpey Babilon ke kokwe mo senkin seyn peys-ma-peys swasow ha ey, seyr hoke kokwe liy ma-lira ley.”^u

²²Babilon akwa, uwrsa gita me ma lokin o, seik-saw-hu me ma lou o, seyr musik senkin senkin me ma mon nakyas o, somokwe liy ma-lonuayk ley, hmo ompok mon kokwe. Uwr senkin-senkin-mey me ma meio sohom seyn, hme nion manon-wak lopa. Mein aiopey hay ko oksa, wit me ma mon nokriy-a-nokriy par-say mokwe, hmo ompok mon ma-lwoun lopa.”^v

²³Lam so ya hokwe hmo ompok mon liy ma-lyar ley. Sa hmo yier mon kokwe, uwrsa homkwe sa-huon-enekwei mo kar ley ok me liy ma-lonuayk ley. Paraw hmo bisnis-uwr homkwe hakamay-uwr lwak liok, uwrsa lowpwarowp mo inour mon kokwe. Seyr homkwe mein-hay senkin senkin non, uwrsa kipay lowpwarowp ko me po mon anyan swakreik ha.”^w

²⁴Babilon ke kokwe mo senkin ke mon piapay, hokwe profet mo nioh o, kristen-uwrsa mo nioh o, serey lokin kwormakwor non-say. Seyr uwrsa kipay lowpwarowp ko me ma lokin kwormakwor say okruie mo nioh seyn, Babilon mon-aw nuw-wak.”^x

Uwrsa homkwe Babilon ke ma mon piapay me kar nuw-ey

19 ¹Sohiy so meyki hokwe ha sawk uwrsa popua hay mo wouk-ok kraiar nonkumey mon moryak eyn senkin wakeyn wakeyn-me me hieyn ke lonuayk,

“God so uru se kwa me-ihay. Huonok-prosue-yor o, panpaniowni o, seyr krai ipey-ar o, hromo God so nian.

²God so yor, uwrsa mo yor me ma lira anon anon mokwe, ok-arar, seyr luw-luw-aw-ar. God hiykwe yokun-nweyh-kane-sa ipey-ar sokwe senkin po me-sakon kawk, hokwe heyn non. Sa sokukwe uwrsa ki ko poya-poya me hoko yokun-nweyh-kane-yor non papo mon piapay. God hiykwe sawk hoke sokwe ma-sahre mon piapay, payhokuaw, hokwe God so mey-uwr me papo mon okin kwormakwor say lowpway.”^y

³Seyr homkwe senkin ma-laun sian me,

“God so uru se kwa me-ihay. Yier aiopey hay sohok ko ya ko yakuw kokwe, enekwei enekwei senkin-aw nwakrok mu ie wayr ey.”

⁴Wo, sios mo makwey-uwr iha seys sune seys ihaiha-aw o, ay ihaiha-aw su ma lwayr sohom o, homkwe pamuow kampueys nok, God se me-ihay, hiy sia-king mon ma liwak sehe. Homkwe senkin me,

^u 18:21 Jer 51:63-64; Ese 26:21 ^v 18:22 Ais 24:8; Ese 26:13 ^w 18:23 Jer 7:34; 16:9; 25:10 ^x 18:24 Jer 51:49; MHO 17:6 ^y 19:2 Lo 32:43; MHO 6:10

“Ok-arar, God so uru se kwa me-ihey.”

⁵Sa wouk-ok sia-king ko hiyke senkin me,

“Mey-uwr lowpwarowp, hye ma hok ama, hom uru lopa lwak hi, seyr uru ipey-ar non lwak hi, hmo prueyn prueynyaw homkwe God so uru se kwa way nonwey ie.”

⁶Wo, ha sawk yowniy-oksa kamon ke senkin makiy-onuayk, uwrso popua hay mo ok ma swa-hokruw ohruw-a ke hieyn. Hmo wouk-ok mokwe hu kraiar mo yowniy-oksa ke hieyn, sa nompow aiopey hay kraiar hom ma lamniy-mamniy woun me hieyn. Homkwe senkin me,

“God so uru se-aw kwa me-ihey hi, payhokuaw, hromo God Hakamay Krai Lowpwarowp non hiyke king, uwrso lowpwarowp me ma hiy-wayr-uwr hiy non.”^z

⁷Pokon ohokwe hromkwe uron yaprue lwak e, seyr kar kraiar kraiar ley e, seyr hye panpaniowni kow e, payhokuaw, enekwei-ar hokwe mo ehe, Sipsip-ney hiy hyo sa ke le huon ey hokwe. Seyr sa sokukwe papo lonhan onhan koruay, hye lonyay huon ey hokwe.^a

⁸God hiyke klos weyspey ihey ke papo lway kow ie, sah ke kokwe.

Klos sokukwe momor-ku-weys ke hieyn, seyr ey se hieyn lyar.”

(Klos sokukwe yor luw-luw-aw-ar, kristen-uwrso hom ma mon me meir.)^b

⁹Sa ensel hiy hane senkin kiy-me, “Hunkwe ok eme kwa kiy-mey: Uwrso God hiykiaw ma me-huonok okrar mokwe, Sipsip-ney so sa-huon-enekwei so ayay aiopey ke non-a ey somokwe, God so uron ihey-ar so ouon-ar lwak.” Seyr hiyke hane senkin nak-mekow, “Ok omokwe God so ok-arar.”^c

¹⁰Ha sawk hyo sune-mawk ohriar mon sehe kampueys won, hye me-ihey e. Sawk hiy hane senkin mekow, “Ohow, hunkwe senkin peie mon o. Ha o, hwon o, hno wayh-om o, hromkwe mey-wayh, okar-ok, Jisas hiy ma me-kumay me ma nakruok uwr hom non. Hunkwe God so uru se-aw me-ihey e!” Payhokuaw, okar-ok, Jisas hiy ma me-kumay somokwe, uwrso me profet-ok ma me-sian-sasian ohruw-a hom non.^d

Uwr, hos weyspey mon ma liwak nak-anio hiy non

¹¹Sohiy so meyki hokwe ha sawk nonkumey hiy kampi se lira, seyr hos kamon weyspey hiyke serey lwak. Uwr, hos weyspey mon ma liwak so uru hokwe senkin mowie: Hiymon-kraiay-wayr-wayr-uwr, seyr Okar-uwr. Hyo lira mesor anon anon mey o, hyo aw lono mey o, hiyke yerki luw-luw-aw non-aw meio.^e ¹²Hyo nene hokwe ya ma loum krikri yar se hieyn. Seyr hyo makwey mon kokwe king so makwey-kokway mokwe kraiar nak-swama-seyn kreik. Hiyke seyr uru kamon hokwe hyo owh mon

^z 19:6 MHO 14:2 ^a 19:7 MHO 21:2 ^b 19:8 Ais 61:10 ^c 19:9 Mat 22:2-3 ^d 19:10 Ap 10:25,26; MHO 22:8-9 ^e 19:11 Sng 96:13; Ais 11:4; MHO 1:5; 6:2

nak-meyamey. Seyr uru sohokwe hiykiaw-aw nonkway, uwr har homkwe nonkway lopa.^f ¹³Klos hiy ma lie kokwe nioh hiykwaw nuw-ohre-yay ha. Hyo uru hokwe, “God so ok.”^g ¹⁴Nonkumey ko aw-uwr popua hay homkwe hmo hos weyspey mon liwak sir lowpway nok, hyo meyki nak-onsu pyay. Homkwe klos weyspey mnow-mnow-aw me swama-seyn kreik. ¹⁵Sawk aw-seik arupey-ar kokwe uwr, hos eir mon ma liwak so woki mon ar-ousne ha. Aw-seik sokukwe uwr sa kipay lowpwarowp ko me lokin eyma-say okruue ey. “Hiykwe uwr sa me kokwe ain-ho non hiy-wayr kraiy ey.” Sng 2:9

Seyr hiykwe wain-ou me ki-saw aiopey hay mon lour sanpasan ompos kreik ey. Ki-saw sohokwe God Krai Lowpwarowp non so aw-mar aiopey-hay se meir. ¹⁶Hyo klos mon o, seyr hyo suowp mon o, uru kamon hokwe senkin nak-mey kow, “King lowpwarowp mo King, seyr hakamay lowpwarowp mo Hakamay.”

¹⁷Sa hakwe ensel prueyn se ma-lira, hiykwe ey mon lorok. Hiykwe ahney lowpwarowp, waw ompok mon ma sian anio seme senkin ar-okre me, “Homkwe oue, erey le swa-hokruw e. Ayay aiopey hay la enekwei, God hiy ma lonhan onhan koruay eme non-a e.”^h ¹⁸Homkwe king mo sopok, aw-uwr mo hakamay mo sopok, uwr seirpey mo sopok, hos mo sopok, uwr hos mon ma liwak sir nak-anio mo sopok, seyr uwr sa lowpwarowp mo sopok, mo mey-uwr puraw mo sopok hi, mo uwr, liaup-uwr lopa mo sopok hi, seyr mo hakamay mo sopok hi, mo uwr uru lopa mo sopok hi, seme la ey.”

¹⁹Seyr hakwe ay piap-araw o, king ki ko lowpwarowp o, seme po nak-ira, homkwe hmo aw-uwr popua hay me seme me-ondar, uwr hos eir mon ma liwak sohiy so sune-non me, aw hiy-ono e. ²⁰Sawk ay piap-araw sohiy o, okrei-profet, meir krai non hyo inour mon ma meio ousne o, hehe kokwe po nekie owk swakawk. Yerki sohiy non kokwe okrei-profet hiykwe uwr sa, ay piap-araw so meir se ma nakruok, seyr hyo owh-nan se ma kamapueys nak-me-ihey somokwe po mon anyan swakreik ha. Ay piap-araw o, okrei-profet o, hehe kokwe inaw-aw po swakawk oum-pru kaw, howk-ya aiopey hay mein-salfa non serey.ⁱ ²¹Sa uwr, hos mon ma liwak hiykwe awia, ma lwak prosue seme lokin eyma-say okruue sa-okruue, aw-seik hyo woki mon ma lousne sohiy non. Sa ahney lowpwarowp somokwe aw-uwr sohom mo owhi-sopok me nuw-a mue lowpway.

Satan hiy 1000 yia kalabus mon ma lwak hiy non

20 ¹Seyr hakwe senkin lira, ensel prueyn hiykwe nonkumey ko se laye, hyo iha kokwe ki, ki-saw limon lopa se kampi ey se

^f 19:12 Dan 10:6; MHO 1:4; 2:17 ^g 19:13 Ais 63:1-3; Jon 1:1,14 ^h 19:17 Ese 39:17-20

ⁱ 19:20 MHO 13:12-17; 20:10

nakruok. Seyr hiykwe ihey mo mays, sen kwaresi hay se nak-nakruok.^j 2-3 Sa ensel sohokwe kyei kwaresi hay pey-pey-iwoh sehe nekie nok, ihey mo mays, sen non lway pruwmapruw. Kyei kwaresi hay sohokwe poup, seyr Satan. Seyr hye kokwe ki-saw limon lopa mon lway swakawk. Seyr hye kokwe ensel hiykwe ki, hiy ma nakruok sohiy non nak-okin sakawk kraiy nok, nak-knuey. Poup sohiy so yia serey ma lwak ey hokwe 1000, hiykwe sankaw sehe lwak ey, hiy uwrsa ki ko me mon warei-arei lopa lwak e. Sawk 1000 yia so meyki hokwe hye kokwe enekwei haraw-aw kor-preisia ha isay wak ey.^k

⁴Wo, hakwe sawk sia-king me makiy-ira. Seyr uwr sia-king serey ma liwak sir somokwe, krai, uwrsa mo yor me lira anon anon ey mokwe papo kow. Hakwe seyr uwrsa har, hmo awia-pow hom ma lokin eyma-say okruwe seme nak-ira. Hme kokwe seme lokin eyma-say okruwe, hom okar-ok, Jisas hiy ma mesor hrahra ha o, seyr God so ok o, seme ma mesor kumay me hokuaw. Seyr homkwe ay piap-araw o, hyo owh-nan o, seme nak-me-ihey pa. Seyr hyo meir piap-araw arian hokwe hmo ine-ku o, iha o, serey isay okin nasay pa. Uwrsa senkin somokwe su ma loksian wayr nok, Jisas se nion 1000 yia king-mey sankaw non-meio wayr ey.^l

⁵Sohokwe peyr-ar ko so loksian hiy non. (Sawk uwrsa ma lokruwe ha mo har mokwe peyr su liy masaw-oksian wayr ley, sa omok 1000 yia sohiy so meyki loksian-sasian ey.) ⁶Uwrsa ma lokruwe ha, God hiy lokruwe peyr-ar ko sok ma me-sian somokwe pekney-weys, seyr homkwe God so uron ihey-ar so ouon mon lwak. Lokruwe meyki ko kokwe krai lopa, hme mamon okruwe ey hokwe. Homkwe God o, Krais o, hoho pris lwak ey, seyr Krais se nion 1000 yia king-mey sankaw non-meio wayr ey.^m

Satan se ma mon piapay ha enekwei hiy non

⁷Sa Satan se kokwe enekwei 1000 yia hiy ley lowpway non kampi kahrer kow ha ey, kalabus ouon ko hokwe. ⁸Sa Satan hiykwe unsaney kipay lowpwarowp ko me lanio me warei-arei kow ey. Uwrsa somokwe Gok, Magok leys so kipay ko hom non. Satan hiykwe uwrsa serey suko me me-huonokyaw ey, hom aw non-ono e. Kipay sohiy so aw-uwr mokwe kraiar, hmo meir mokwe wosion me hieyn.ⁿ ⁹Aw-uwr somokwe kipay lowpwarowp mon ley-neyney nok, yier, God so uwrsa hom ma lwayr, seyr hyo uron-pi ko-ar ma lwak sehe nak-kanseyr ono. Sawk ya nonkumey ko hok laye nok, aw-uwr seme maka-oum kwor-say okruwe.^o ¹⁰Wo, poup, God so uwrsa seme ma mon warei-arei kow sohokwe, howk, ya aiopey hay mein salfa non serey lway swakawk oum-pru kawk, paraw ay piap-araw o, okrei-profet o, hehe ma lway swakawk

^j 20:1 MHO 9:1 ^k 20:2-3 Stt 3:1 ^l 20:4 Dan 7:9,22,27; 1 Ko 6:2; MHO 13:17

^m 20:6 MHO 1:6 ⁿ 20:8 Ese 38:2,9,15-16 ^o 20:9 2 Kin 1:10

serey. Homkwe arawh eypok, arawh eypok, aw serey-aw nuwnak-ok wayr-wayr ey.^p

Mesor anon anon enekwei pariawey-ar hiy non

¹¹Hakwe sawk sia-king weyspey aiopey hay o, uwr, serey ma nak-iwak sohiy o, sehe lira. Sawk ki o, nonkumey o, hyo inour ko se non-hakan nok. Hohkwe yop manon-wak ey lopa. ¹²Sa hakwe uwr sa ma lokrue ha me lira, uwr sa uru non o, uru lopa o, homkwe sia-king so inour mon nakrok-kay. Mamey me kamapi-yay, peypey pa, mamey kamon ke makiy-kampi yay. Mamey sokukwe su lwayr peyow peyow ey hok non. Wo, uwr sa ma lokrue me kokwe, sa seme lira mesor anon anon, yor, hom ma mon mo liy-liy-aw-ar, mamey mon ma mey iawon senkin.^q ¹³Sour-yawp-ar hiykwe seyr lokrue-uwr sa hyo mon ma lwak seme isay ha. Seyr Lokrue o, Lokrue-mo-yier o, hohkwe uwr sa hehe nion ma lwak seme ma-isay ha. Seyr uwr sa ma lokrue me kokwe hmo prueyn prueyn-aw mo yor arian homkiaw ma mon mo liy-liy-aw lira mesor anon anon.^r ¹⁴Senkin lon lowpway nok, Lokrue o, Lokrue-mo-yier o, sawk howk-ya serey lway swakawk. (Howk-ya sokukwe lokrue meyki ko hok non.) ¹⁵Seyr uwr prueyn so uru mamey, su lwayr peyow peyow ey mon ma mey lopa hokwe, howk ya non mon lway swakawk.

Nonkumey iwon o, ki iwon o

21 ¹Sohiy so meyki hokwe ha sa nonkumey iwon o, ki iwon o, hehe makiy-ira. Payhokuaw, nonkumey porih o, ki porih o, hehekwe papo lira por ha lowpway. Seyr sour-yawp-ar hiykwe korey ma-lwak pa.^s ²Seyr ha makiy-ira, yier aiopey pekney-weys, God so mon ma lwak hiy nonkumey ko se laynak-aye se. Yier aiopey sohokwe Jerusalem iwon hiy non. Yier sohokwe papo lonhan onhan howhway naruok koruay, sa sokruan, hok hoko uwr se ma liwak ey ke hieyn.^t ³Sawk hakwe wouk-ok kamon sia-king ko hiy aiopey hay senkin ar-okre me-ha se lonuayk: “Pokon ohokwe God so a hokwe, uwr sa mo ompok mon lwak! Seyr hiykiaw kokwe hme nion non-wayr, seyr uwr sa somokwe, hyo nian-ar lwak ey. Seyr God hiykiaw kokwe hme nion non-wak ey. Seyr hiykwe hmo God-ar lwak ey.^u ⁴Hiykwe eheyr-hu lowpwarowp hmo nene ko me noh ahahay kow lowpway ey. Enekwei sohiy non kokwe seyr uwr sa homkwe ma-lokrue lopa, seyr unuaw nak-iwak sir yuk lopa, seyr eheyr ma-lyuk lopa, seyr aw lok lopa. Payhokuaw, enekwei sohokwe yor paraw-uh ko mokwe papo lira por ha.”^v

^p 20:10 Sng 11:6; MHO 19:20; 21:8 ^q 20:12 Dan 7:10; Mat 25:31-46; 2 Ko 5:10

^r 20:13 Ro 2:6; 1 Pi 1:17; MHO 22:12 ^s 21:1 Ais 65:17; 2 Pi 3:13 ^t 21:2 Ais 52:1; Hi 11:16; MHO 3:12 ^u 21:3 Ese 37:27; Sek 2:10; 2 Ko 6:16 ^v 21:4 Ais 35:10; 65:19; MHO 7:17

⁵Uwr sia-king mon ma liwak hiy ma-kiy-me, “Pokon ohokwe, hakwe omeme lowpwarowp mokwe pa iwon-ar kiy-mon ousne.” Hiykiaw kokwe seyr hane senkin makiy-mekow, “Hunkwe ok eme kwa mey, payhokuaw, ok omokwe ok-arar, seyr liy nan kiykiy-ay kraiyay wayr.”^w

⁶Seyr hiykwe hane senkin makiy-mekow, “Mey lowpwarowp mokwe papo kiy-meio lowpway. Hakwe Peyr-ar ko, seyr Meyki-ar ko, hakwe su-lwayr-pie-uwr, seyr su-lwayr so pariawey-ar hiy non. Uwr huei posokwaw krah e, hakwe hye su lwayr peyow-peyow-hu, ki-saw-eyh ko se liy isay owsa. Hiykwe nakway owsa lopa.^x ⁷Sawk unsaney aw-owk yaprue posokwaw lowk e, hakwe omeme somokwe hme kow ey. Sa hakwe hmo God lwak, seyr homkwe hano ney-ar lwak.^y ⁸Sawk uwrsa, low me ma hok o, uwrsa Jisas se ma nan kiykiy-ay lopa o, uwrsa yor piap-araw senkin senkin me ma mon sohom o, uwr, uwrsa har me ma lokin kwor o, uwrsa yokun-yor uwrsa me nion ma non-nweyh kane sohom o, uwr nokous-mey ma meio o, uwrsa, okrei-god me ma nakyas o, uwrsa okrei-ok ma mesor o, uwrsa senkin sohom mo yier hokwe, howk-ya aiopey hay mein-salfa non hok ma loum mon lwak ey. Sohokwe lokrue meyki ko hok non.”^z

Jerusalem iwon, Jon hiy ma lira hiy non

⁹Sa ensel iha sirom mu nareysyar mo prueyn, hiy yowr iha sirom mu nareysyar low pariawey non me ma nakruok hiykwe, hano owh mon le nok, senkin me, “Hunkwe oue, hakwe hne mesair kow ley, sa, uwr ma liwak ey ke, Sipsip-ney so sah ke.” ¹⁰Wo, hane kokwe sa Niohney Pekney-weys hiy leyneyr-kawk prusow menkin, sa ensel hiy hane lway nwakey, mnuw kwaresi hay so pi-ar mon. Hiykwe sa hane sehe kiy-mesair kow, yier pekney-weys Jerusalem, hiy God so yier nonkumey ko se ma laynak-aye sehe.^a ¹¹God so panpaniowni hiy ma-kanuw-yar howriy howriy say nekie nekie, yier Jerusalem sohokwe. Panpaniowni sohokwe mein ihey-ar se hieyn, seyr mein jasper se hieyn, seyr glas ke hieyn lira ok-sanweyr-anweyr.^b ¹²Yier Jerusalem iwon so hir kokwe ayaw-ar nuw-meio, seyr yerki-wouk mokwe sankaw, iha seys mu nareysyar non. Yerki-wouk mon kokwe ensel iha seys mu nareysyar non hom nakrok-kay. Seyr yerki-wouk mokwe Israel mo uwrku iha seys mu nareysyar mo uru mokwe serey nak-meyamey nakrok-kay.^c ¹³Ey-kaie mon kokwe yerki-wouk mokwe krompri senkin lwak, muwmon not-ok ma me hokwe, krompri, seyr muwmon saut-ok ma me hokwe krompri, ey-kuakeyn mon kokwe krompri. ¹⁴Seyr yier iwon Jerusalem so hir kokwe mein iha seys mu nareysyar non ma los yay won ha so eir mon meio iarak. Sa mein kamon kamon-aw mo eir

^w 21:5 2 Ko 5:17 ^x 21:6 Ais 55:1; Jer 2:13; Jon 7:37 ^y 21:7 2 Sml 7:14; Sng 89:26-

27 ^z 21:8 Mat 25:41; Hi 10:38-39; MHO 22:15 ^a 21:10 Ese 40:2 ^b 21:11 Ais 60:1-2,19

^c 21:12 Ese 48:30-35

mon kokwe, Sipsip-ney so aposel iha sirom mu nareysyar mo uru me nak-meyamey nakrok-kay.

¹⁵Seyr ensel, hane ma lohruw-a kow sohokwe mon kamon kekcie meir ey, gol non ma monhre se nakruok, yier iwon Jerusalem o, yerki-wouk o, hir o, seme meir ey hokwe.^d ¹⁶Yier iwon aiopey Jerusalem so erey-rey ihaiha-aw mokwe meir liy-liy-aw nuw-wak. Hyo meimey o, hyo aiopey o, meir liy-liy-aw. Ensel sohokwe yier sehe meir ira, hyo mon kekcie meir ey non. Sawk senkin mesair kow, 2200 kilomita. Yier sohiy so meimey o, aiopey o, mawk-pi o, somokwe liy-liy-aw-ar nuw-wak. ¹⁷Hiykwe seyr yier sohiy so hir ko mawk-pi ihaiha-aw kokwe senkin meir ira, 144 mita. Mita sokukwe a-meio-uwur ki ko hom ma nakruok me hieyn. ¹⁸Yier iwon Jerusalem sohiy so hir mokwe mein jaspa non meio. Sa yier-ar hokwe gol mnow-mnow-aw, glas ke hieyn ma nuw-yar ok-sanweyr-anweyr non meio. ¹⁹Seyr yier aiopey sohiy so hir ko mein ma los-yay won ha pie mokwe, mein yaprue-ar ihey senkin senkin non nuwnak-howhway nakrok-kay. Mein peyr-mawk ma los-yay won pie kokwe, mein jaspa, kreys kokwe mein sapaia, krompri kokwe mein aget, iha-ihaw kokwe mein emeral.^e ²⁰Iha sirom kokwe mein sadonikis, iha sirom pruw kokwe mein oupuey konilian, iha sirom mu nareys kokwe, mein wouknow-si krisolait, iha sirom krompri kokwe mein norku beril. Iha sirom iha-ihaw kokwe mein wouknow-si topas, iha seys kokwe mein krisopres, iha seys kamon kokwe mein haiasin, seyr iha seys mu nareysyar kokwe mein ametis. ²¹Yier sohiy so yerki-wouk iha seys mu nareysyar mokwe, mein momor hom non. Seyr yier sohiy so yerki-wouk lowpwarowp mokwe, mein momor kamon kamon-aw non monhre. Sawk yier sohiy so lanio-yerki mokwe gol mnow-mnow-aw non monhre. Gol somokwe glas eyn lira sakeyn sakeyn ha.

²²Yier aiopey hay sohokwe hakwe God so a pekney-weys kamon se lira pa, payhokuaw, God Hakamay Krai Lowpwarowp non o, seyr Sipsip-ney o, a pekney-weys sohiy non. ²³Yier aiopey sohokwe ey o, yeyn o, seyn lyar kow pey, payhokuaw God so panpaniowni hiykiaw lyar kow. Seyr Sipsip-ney sohokwe yier sohiy so lam hiy non.^f ²⁴Uwrsa kipay lowpwarowp ko homkwe God so ey-yar, yier aiopey se ma lyar kow sohiy so ouon mon-aw lwayr ey. Seyr kipay lowpwarowp mo king homkwe hmo omeme ihey-ar me nak-e kow ey.^g ²⁵Seyr yier aiopey sohiy so yerki-wouk mokwe senkinaw-aw kamapi nakrok-kay wayr ey, eypok lowpwarowp mokwe. Hmekwe piar-ay lopa. Payhokuaw, yier sohokwe arawh lopa lwak ey.^h ²⁶Seyr yier kipay lowpwarowp ko homkwe, hmo omeme mnow-mnow-aw ihey-ar me yier aiopey hay serey nake nene kow ey. ²⁷Omeme

^d 21:15 Ese 40:3; MHO 11:1 ^e 21:19 Ais 54:11-12 ^f 21:23 Ais 60:19-20; MHO 22:5

^g 21:24 Ais 60:3,5 ^h 21:25 Ais 60:11

senkin senkin orki non o, uwrso owh-mar-yor me ma mon ousne o, seyr okrei-yor me ma mon o, homkwe liy lyawriy ley. Sawk uwrso mo uru sa-u, Sipsip-ney so mamey su lwayr ey mon ma mey iawon homkwaw lyawriy ey.ⁱ

Yawp, su lwayr ey hiy non

22 ¹Sohiy so meyki hokwe, ensel hiykwe sa hane yawp, su lwayr ey se makiy-mesair kow. Yawp sohokwe glas se hieyn-aw nuw-ok-sanweyr-anweyr. Yawp sohokwe God so sia-king o, Sipsip-ney so sia-king o, serey suko se lousne keyn.^j ²Sa ehie, yier iwon aiopey so yerki ompok-ar ma kyor-swanon keyn kie. Seyr yawp sohiy so ki-someik ereyrey hokwe now, su lwayr peyow peyow ey hokwe serey liarok. Now sohiy i leip sawan kreik mokwe, enekwei iha seys mu nareysyar sankaw leip, yia kamon-aw-aw hokwe. Now sohiy so ma mokwe, uwrso kipay lowpwarowp ko mo peik senkin senkin non me mon sasowriy sow kow ey.^k ³Yier serey mon kokwe omeme, God hiy ma hruo mokwe, homkwe liy ma-lirway ley. Sawk God so sia-king o, Sipsip-ney so o, hohkwaw non-wak ey. Seyr hyo mey-uwr homkwe, hye-aw me-ihey ey. ⁴Homkwe hyo ine-maku se lira ey, seyr hyo uru hokwe hmo ine-ku mon mey kow ey.^l ⁵Enekwei sohokwe arawh lopa, seyr homkwe lam-ya lopa lwak ey, seyr ey hiy lyar kow ey lopa, payhokuaw, Hakamay God hiykiaw kokwe ey-yar, hme lyar kow ey. Sa homkwe king-mey senkin-awaw meio wayr peyow-peyow ey.^m

Jisas hiy le ey hiy non

⁶Sa ensel hiy hane kiy-me, “Ok somokwe ok-arar, seyr liy nan-kiykiy-ay kraiy wayr. Seyr God Hakamay, hyo Niohney se profet lowpwarowp me ma kow, hiykwe hyo ensel se me-ha, hyo mey-uwr me mesair kow e, yor omok lousne-sa-ousne ey me.”ⁿ

⁷“Kwa lonuayk, hakwe pa makiy-e ohriar, peypey ey korey. Profet-ok, mamey ohok ko ke posokwaw nakruok e, homkwe God so uron ihey-ar so ouon mon lwak.”^o

⁸Hakwe Jon, hakwe weynpaweyn seme ma lira onuayk-uwr hiy non. Wo, ha weynpaweyn seme lira onuayk lowpway menkin, hakwe sawk pamuow kampueys won, ensel hane yor senkin me ma mesair kow so sune-mawk ohriar mon, hye nak-me-ihey e.^p ⁹Sawk hiykwe hane senkin me, “Ohow, hunkwe senkin peie mon o. Hwon o, hno wayh-om profet lowpwarowp o, seyr uwrso lowpwarowp, ok mamey erey ma lwak me

ⁱ 21:27 Ais 52:1; Ese 44:9; 1 Ko 6:9-10 ^j 22:1 Ese 47:1 ^k 22:2 Ese 47:12; Jol 3:18; Sek 14:8 ^l 22:4 Mat 5:8; MHO 3:12 ^m 22:5 Dan 7:27; MHO 5:10; 21:25 ⁿ 22:6 MHO 1:1 ^o 22:7 MHO 1:3 ^p 22:8 MHO 19:10

ma nakruok sohom o, hakwe hmo mey-wayh. Hunkwe God se-aw nak-ie me-ihey e.”

¹⁰ Sa hiy hane senkin me-kow, “Profet-ok, mamey erey ma lwak omokwe, hunkwe peie nak-okin nasay kupaku o, payhokuaw, enekwei pau ohriar lwak. ¹¹ Uwrsa yor piap-araw me posokwaw mon wayr e, kwa wawk mon wayr. Uwrsa yor orki non me posokwaw mon wayr e, kwa wawk mon wayr. Uwrsa yor luw-luw-aw me-aw ma mon homkwe seyr yor luw-luw-aw me-aw kwa nuw-mon. Seyr uwrsa pekneyweys-aw ma lwak homkwe pekneyweys-aw kwa nuw-wak.”^q

¹² “Kwa lonuayk, hakwe peypey ey korey, hakwe pa kiy-e ey. Omeme ihey-ar mokwe hano mon lwak. Hakwe uwrsa me kokwe, uwrsa mo yor mo memeir nonaw lowndiy kow ey.”^r ¹³ Hakwe Peyr-ar ko, seyr hakwe Meyki-ar ko. Hakwe su lwayr pie-uwr, seyr hakwe su lwayr so pariawey-ar hiy non.”^s

¹⁴ Uwrsa hmo klos me ma peyryapeyr mnow-mnow homkwe God so uron ihey-ar so ouon mon lwak. Su lwayr peyow peyow ey so now-i mokwe, homkwe liy la. Seyr homkwe yier aiopey so yerki-wouk mon liy lyawriy.^t ¹⁵ Uwrsa piap-araw, uwr, hay piap-araw senkin senkin non, seyr uwrsa yokun ma nweyh kane, seyr uwr, uwr har me ma lokin kwor okruwe, seyr uwr, okrei-god me ma me-ihey, seyr uwr, okrei-yor me kar nonaw ma meio wayr, uwrsa senkin somokwe God so taun mon liy isay yawriy ley.

¹⁶ “Hakwe Jisas, hakwe hano ensel se hmo owh mon sehe me-ha, hiykwe ok seme mesor kow e, sios mon. Hakwe king Devit so Ney-nona-ar. Hakwe Napuar leison ma lyar kow nerie hiy non.”^u

¹⁷ Niohney o, Sa, uwr ma liwak ey sohok o, hohkwe senkin me, “Oue!” Seyr uwrsa lowpwarowp, hom ok seme ma lonuayk seyn, senkin-aw kwa me, “Oue!” Uwr huei posokwaw krah e, hom seyn liy le. Su lwayr peyow-hu se posokwaw lowswa e mon e, homkwe maym, asuare hiy ma kow se hieyn-aw kwa lonok.”^v

Jon so me-kupaku-ok ipey-ar

¹⁸ Hakwe Jon, hakwe uwrsa lowpwarowp, profet-ok mamey erey ma lwak me posokwaw lonuayk e, hakwe hme ok-ar senkin me-kumay kupaku kow: Uwr prueyn ok kopi kamon irweyk ke ok erey ma mey me nak-mey peykyay ankin, God hiykwe low piap-araw, mamey erey ma mey mokwe, hyo mon manak-kekcie peykyay kow. ¹⁹ Seyr uwr prueyn hiykwe profet-ok kopi har, mamey erey suko me mon-say ankin, seyr God hiykwe

^q 22:11 Dan 12:10 ^r 22:12 Ais 40:10; Jer 17:10; MHO 2:23 ^s 22:13 Ais 44:6; MHO 1:8,17; 21:6 ^t 22:14 Stt 2:9; 3:22 ^u 22:16 Nam 24:17; Ais 11:1,10; MHO 2:28; 5:5 ^v 22:17 Ais 55:1; MHO 21:6

hyo omeme yaprue, hye ma kow liok seme ma-kahya onokyaw. Hiykwe su lwayr now-i sehe liy non-a ley. Seyr taun pekney-weys mon non-wayr lopa.^w

²⁰Uwr, omeme seme ma mesor kumay kow hiykwe senkin me, “Okar, hakwe peypey ey korey, hakwe pa kiy-e ey.”

Ok-ar, Hakamay Jisas, hunkwe kwa saw-e.^x

²¹Hakamay Jisas so maym kow yor mokwe God so uwrsa me nion ka lwak. Ok-ar.

^w 22:19 Lo 4:2; 12:32 ^x 22:20 MHO 2:16